

కొరింధీయుల్క రెగిడ్లి మొదొల్చి ఉత్త్రమ్ బారిక్ జలో పవులు కొరిండ్ పట్టుమ్చి సంగుమ్చక రెగిడ్లి మొదొల్చి ఉత్త్రమ్

మొదొల్ కోడు

¹ యేసుక్రీస్తుచి తెడి సుద్ది జా దేముడచయ్ మాన్సుల్ జల కొరింది పట్టుమ్చి సంగుమ్ సుదల్క పావులు అమ్చొ బావుడు జలో సొస్తానేసు తెన్ రెగిడ్లి ఉత్త్రమ్. ² క్రీస్తు జలో యేసుచి రిసొ సుబుమ్ కబుర్ నూనయ్తో జోచొ బారికి అవ్ జంక మెనయ్ దేముడు జోచి ఇస్తుమ్క అంక నిసాన అస్సె. అమ్చొ ప్రబు జోచొ ప్రబు జలో యేసుక్రీస్తుతె 'తుచితెయ్ రచ్చన అస్సె. తుయి ప్రబు' మెన జోచి నావ్ దెరన్తన ఎత్తిజిన్ తెన్ తుమ్క కి 'అంచి సుద్ది జా అంచయ్ మాన్సుల్ జతు' మెనయ్, దేముడు బుకార అస్సె. ³ జలె, అమ్క తుమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

⁴ తుమ్చి రిసొ ఎత్తి అదికారుమ్ తిలో దేముడుక రోజుక ప్రార్దన కెర అంచి సర్ద జోక నూనయ్తసి. కిచ్చొచి రిసొ మెలె, యేసుక్రీస్తుక తుమ్ నంపజా అప్పె జోచి తెడి తిలి రిసొ జోచి దయక దేముడు తుమ్క దిలి రచ్చనచి రిసొయి. ⁵ మెలె, జా రచ్చన దిలి తెంతొ క్రీస్తుచి తెడి గ్యానుమ్ ఎత్తి, జా గ్యానుమ్ బోదన కెర్తి సెక్తి ఎత్తి, తుమ్క కలుగు జలి రిసొ పూర్తి ఎత్తితె సొమ్మారుమ్ జా అస్సున్. ⁶ దస్సి, క్రీస్తుచి రిసొ అమ్ సంగిలి సాచి తుమ్చి పెట్టి రుజ్జు జా అస్సె.

⁷ జాకయ్, అమ్చొ ప్రబు జలో యేసుక్రీస్తు జోచి గవురుమ్ తెన్ అన్నె ఉత్త్ర జెతిన్క తుమ్ రకితె ఎద, అవ్సురుమ్ బలి కిచ్చొ ఆత్మసెక్తి కి తుమ్క పిట్టె నాయ్. ⁸ ఆకర్ దీసల్క లోకుమ్చక ప్రబు జలో క్రీస్తు

వెల్లి పరిచ్చు, వెల్లి తీర్పు కెరై ఎదక, తుమ్ పొరపాట్ నే జతి రితి జొయ్యి తుమ్క జా సెక్తి దెతె తయెదె. ⁹ పుత్తున్ జలో అమ్చొ ప్రబు జలో యేసుక్రీస్తు తెన్ తుమ్ బెదితి రిసా తుమ్క బుకార్లొ దేముడు నిదానుమ్చొ, జో సంగిల్ రితి కెరెదె, జో సంగిలిసి జర్గు కెరెదె.

గోసల్ పొన మెన పావులు గోల కెర్రిసి

¹⁰ ఓ బావుడ్లు, అమ్చొ ప్రబు జలో యేసుక్రీస్తుచి నావ్ తెన్ కిచ్చొ మెన అవ్ తుమ్క బతిమాల్పా జా సంగితసి మెలె, తుమ్ జట్టి నే జతె, ఎక్కి మెన్సు జా, ఎక్కి కట్టు జా, తుమ్ ఎక్కి బుద్ది ఎక్కి మెన్సు జా చెంగిల్ జా. ¹¹ బావుడ్లు, కిచ్చొక ఇసి మెంతసి మెలె, తుమ్తె సగుమ్జిన్ జట్టి జా అస్తి మెన క్లొయెచ గెర్చ సుదల్ అంక సంగ అస్సి. ¹² మెలె, “అవ్ పావుల్చొ సుదొ” జవున్, “అవ్ అపొల్లోచొ సుదొ” జవున్, “అవ్ కేపాచొ సుదొ” జవున్, నెంజిలె “అవ్ క్రీస్తుచొ సుదొ” జవున్ మెన తుమ్ ఎత్తిజిన్ తేడల్ ఉచరన సంగన్తసు మెన ఆవ్ జాని. ¹³ క్రీస్తుచి ఆగ్ సింద వాటల్ కెర అస్సున్ గే? తుమ్చి పాపుమ్ గెచ్చయ్తి రిసా అవ్ పావులు సిలువతె మొర్లయ్ గే? అవ్ పావులుచి నావ్ తెన్ బాప్తిసుమ్ నజన్లదు గే? ¹⁴ నాయ్. క్రీస్తుక చి గాయియుక పిట్టవ అవ్ కక్క బాప్తిసుమ్ నే దిలి రిసా అంక చెంగిలి. ¹⁵ కక్క కక్క బాప్తిసుమ్ దెతయ్ జలె, ‘పావుల్చి నావ్ తెన్ బాప్తిసుమ్ సంగిలమ్’ మెన ఏక్ వేల తుమ్తె సగుమ్జిన్ సంగిత. ¹⁶ స్తెవనుచి గేర్చక బాప్తిసుమ్ దిలయ్, గని అన్నె కక్క బాప్తిసుమ్ దిలయ్ గే నాయ్ గే వచ్చ అస్సి. నాయ్, కిచ్చొగె. ¹⁷ క్రీస్తు అంక తెద్రయ్లిసి బాప్తిసుమ్ దెతి రిసా నాయ్, గని సుబుమ్ కబుర్ నూనవ అవ్ బోదన కెర్తి రిసాయి. వడ్డె, ఒగ్గర్ తెల్విచ కొణొచి ఉప్పిరి కొణొ బెదయ్తి రితి అవ్ బోదన కెర్తి రితి తెద్రయ్ నాయ్. దస్సి బోదన కెర్తయ్ జలె, క్రీస్తు సిలువతె మొర మాన్సుల్క పాపుమ్ తెంతొ రచ్చించువ కెర్లిన్ ముక్కిమ్ జలిన్క లుంకడ్లి రితి జతి. రచ్చించువ కెర్తి సెక్తి జో మొర అర్పితుమ్ జలిన్తెయి అస్సె.

క్రీస్తు దేముడుచి సెక్తి గ్యానుమ్

18 మొర పాపుమ్తె గెతస, జలె, ప్రబు సిలువతె మొర అర్పితుమ్ జలిన్చి కోడు సూన్లె, నాసెనుమ్ జతసక కి వెర్రి గని ఆమ్ రచ్చించుప జతసక, జలె, దేముడుచి సెక్తి మెన జానుమ్. 19 కిచ్చొక మెలె, దేముడుచి కొడొతె,

*“పండితుల్చి గ్యానుమ్క పాడ్ కెరిందె, తెలివి మాన్సుల్చి తెలివి పిట్టయిందె”
మెన రెగ్గవ అస్సె.

20 ఒగ్గర్ బుద్ది తిల నుదొ కేతె? మోసె తెన్ దేముడు దిలి ఆగ్గుల్ సికడ్డన కేతె? ఈంజ ఉగుమ్తె తెలివి తెన్ కొడొ బెదవ రుజ్జుల్ దెకయ్తస కేతె? ఈంజ లోకుమ్చి గ్యానుమ్క ‘గ్యానుమ్ నెంజె’ మెన, దేముడు దెకవ అస్సె. 21 కిసి మెలె, కెద్ది గ్యానుమ్ కలుగు జలెకి, ఈంజ లోకుమ్చ మాన్సుల్ దేముడుక నేన్ల. ‘మాన్సుచి సొంత గ్యానుమ్ జోవయించి సొంత సెక్తిక జేవ్ నెత్తిర్లెకయ్ చెంగిలి’ మెన, జోచి పెట్టిచి గ్యానుమ్క దేముడు జానయ్ దస్సి జర్గు కెర్లన్. జాకయ్, అమ్ బోదన కెర్తి నుబుమ్ కబుర్ ‘గ్యానుమ్ నెంజె’ మెన జోవయించి సొంత సెక్తి మాన్సుల్ ఉచర్లె కి, జా నుబుమ్ కబుర్ తెయి మాన్సుల్క రచ్చించుప కెరుక జో దేముడు సర్ద జలొ. గని నుబుమ్ కబుర్ నంప కెర్తిన్క ‘తెలివి నాయ్’ మెన మాన్సుల్ సంగితతి. 22 మెలె, ‘జోచి సత్తిమ్క రుజ్జు దెకయ్త వెల్లెల కమె దెకయ్లెకయ్ నంపజమ్దె, నెంజెలె నాయ్’ మెన యూదుల్ సంగిల. ‘కొడొ తెలివి తెన్ బెదయ్లెకయ్ జా బోదనక విలువ దెకుక జయెదె’ మెన గ్రికుల్ సంగిల. 23 గని “క్రీస్తు సిలువతె మొర అర్పితుమ్ జలిన్తెయి మాన్సుచి రచ్చన” మెన అమ్ బోదన కెర్తసుమ్. ఇసి బోదనక అడ్డు మెన యూదుల్ సంగితతి, ‘తెలివి నాయ్’ మెన యూదుల్ నెంజెలన సంగితతి. 24 గని దేముడు నిసాన బుకార్లసక, జేవ్ యూదుల్ జలెకి, †గ్రికుల్ జలెకి, జో దేముడుచి సెక్తి కి గ్యానుమ్ కి క్రీస్తుతెయ్ అస్సె. క్రీస్తు

* 1:19 1:19 యెసయా 29:14. † 1:24 1:24 ఇన్నె ‘గ్రికుల్’ మెలె, యూదుల్ నెంజెలన మొత్తుమ్క సంగితయ్.

దేముడుచి సెక్తి, జొయ్యి జోచి గ్యానుమ్. 25 దేముడు కెర్తినక 'బుద్దిచి నెంజె' మెన మాన్సుల్ ఉచల్లె కి, జా కేన్ మాన్సుచి గ్యానుమ్చి కంట వెల్లి. జో దేముడుచి అప్పు కేన్ మాన్సుచి సెక్తిచి కంట ఒగ్గర్ సెక్తిచి.

26 బావుడ్లు, ప్రబు తుమ్కయ్ నిసాన బుకార్లో. జలె, తుమ్తె తొక్కిజినక ఈంజ లోకుమ్చి గ్యానుమ్ ఒగ్గర్ కల్లుప జా అస్సె. తుమ్తె తొక్కిజిని వెల్లెల మాన్సుల్ జా అస్సున్. తుమ్తె తొక్కిజిని వెల్లెల కుట్టంబల్తె జెర్మిలదు. 27 గని దేముడు, ఈంజ లోకుమ్తె తెలివి నెంజిలనకయ్ నిసాన్లన్. కిచ్చొక మెలె, తెలివి తిలనక కి లాజ్ కెరుక మెన. సెక్తి తిలనక కి లాజ్ కెరుక మెన ఈంజ లోకుమ్తె సెక్తి నెంజిలనక దేముడు నిసాన్లన్. 28 పడ్డో ఈంజ లోకుమ్తె విలువ జలిన్క 'కిచ్చొ నెంజె' మెన రుజ్జు తంక ఈంజ లోకుమ్తె విలువ నెంజిలనక, నిస్కారుమ్ జలనక, కిచ్చొ నెంజిలనక జో దేముడు నిసాన్లన్. 29 కిచ్చొక మెలె, దేముడుచి మొక్కె కేన్ మాన్సు గవురుమ్ ఉచరనుక బెదె నాయ్ మెన రుజ్జు దెకవుక. 30 యేసుక్రీస్తుచి తెడి తుమ్క జియడ్లొ దేముడు జొయ్యి, అమ్చి గ్యానుమ్, అమ్చి పున్నిమ్, అమ్చి సుద్ది, అమ్చి రచ్చన క్రీస్తుతెయ్ మెన దేముడు అబ్బొసి జోకయ్ అమ్చి రిసా టీవొ కెలన్. 31 జాక దేముడుచి కొడొతె, †“మాన్సుల్ గవురుమ్ సంగుక ఇస్తుమ్ జలె, కచి రిసా సంగుత్ మెలె, ప్రబుచి రిసాయి” మెన రెగ్గవ అస్సె.

2

1 ఓ బావుడ్లు, ఆవ్ తుమ్తె తెదొడి జా కెర దేముడుచి చి సాచి సూనయ్లి పొది ఒగ్గర్ తెలివి గ్యానుమ్ కొడొ బెదవయ్ బోదన కెరి నాయ్. 2 ఆవ్, 'యేసుక్రీస్తుచి రిసాయి మెలె, సిలువతె మొర జర్గు కెర్లి యేసుక్రీస్తుచి రిసా నెంజిలె, అన్నె కిచ్చొ కి తుమ్చి మదెనె అన్నె కిచ్చొ నేని మెన వేరచి బెదవుక నెంజె' మెనయ్ దస్సి కెర్లయ్.

† 1:31 1:31 యిర్మీయా 9:24.

3 వడ్డో తుమ్చితె తిలి పొది, 'సొంత సెక్తిక కిచ్చొ కెరుక నెతిరి' మెన బయిమ్ తెన్ బలే అద్దుర్ తెన్ తిలయ్. 4 తుమ్చి నముకుమ్ మాన్సుల్చి గ్యానుమ్ తెన్ నే జతె, గని దేముడుచి సెక్తి తెన్ ఆదారుమ్ కెరన తంక మెన, 5 ఆచ్ లట్టబ్లె కి చి సాచి సూనయ్లె కి, తెలివి గ్యానుమ్చ తియాన కొడో నే బెదయ్తె, సుద్ది తిలి ఆత్మచి దేముడుచి సెక్తి దెకయ్తి రిసాయి మెన సంగితసి మెనయ్ ఇసి జర్గు జంక మెన జోచి సెలవ్.

ఆత్మతె వడ్డిలనక ప్రబుచి గ్యానుమ్ సికడ్డిసి

6 ఆత్మతె వడ్డిలనక గ్యానుమ్ తెన్ సికడ్డుసుమ్, జా గ్యానుమ్ కేడయ్ గెతి చి జా ఈంజ ఉగుమ్చి గ్యానుమ్ నెంజె, ఈంజ ఉగుమ్తె ఏలుప కెర్తనచి గ్యానుమ్ నెంజె. 7 ఆమ్ సికడ్డి గ్యానుమ్ దేముడుచి గుట్టు తెన్ తిలి లుంకడ్డి గ్యానుమ్; ఈంజ గ్యానుమ్ గుట్టు తెన్ లుంకడ తయె నాయ్. ఉగల్ ఎత్కిచి కంట అగ్గెయి దేముడు అమ్చి రిసా 'పరలోకుమ్చి ఉజిడతె బెదుతు' మెన ఉచర జర్గు కెర్లి గ్యానుమ్.

8 ఈంజ ఉగుమ్చ అదికారుల్ కోయి ఈంజ గ్యానుమ్క అర్దుమ్ కెరంతి నాయ్; జా అర్దుమ్ జోక జతి జలె గొప్ప ఉజిడచొ రుపుమ్చొ గవురుమ్ తిలో ప్రబుక సిలువ గల మారిత నాయ్. 9 గని దేముడుచి కొడోతె,

“ఇన్నెచి రిసా దేముడు తెయార్ కెర అస్సె”

జోక ప్రేమ కెర్తనక కిచ్చొ దెంక మెన తెయార్ కెర్లిసి

*“జా కేన్ అంకితె డీసె నాయ్,

కేన్ కంగ్గొతె సుని జయె నాయ్,

కేన్ మాన్సు జోచి పెట్టి ఉచరుక నెతిర్లిసి”

మెన రెగ్డవ అస్సె. 10 అమ్క జలె దేముడు ఎత్కి జోచి ఆత్మ తెద్రవ రుజ్జు దెకవ అస్సె; జా ఆత్మ ఒండిక, దేముడు గుట్టుల్చి రుజ్జుల్ కి జోచి ఆత్మ రుజ్జు దెకయెదె. 11 ఏక్ మాన్సుచి ఉద్దెసుమ్ జోచితె తిలి

* 2:9 2:9 యెసయా 64:4.

మాన్సుచి సొంత ఆత్మక పిట్టవ, జో మాన్సుచి పెట్టి తిలిసి కో జాన్తి గే? దస్సి, దేముడుచి ఉద్దెనుమ్లు దేముడుచి సుద్ది తిలి ఆత్మక ముల, జోచి ఉద్దెనుమ్ అన్నె కోయి నేన్తి.

12 దేముడు అమ్క దిల ఆత్మ కిసిచి గే అమ్ అర్దుమ్ కెరనుక. అమ్ ఈంజ లోకుమ్చి ఆత్మ నెంజె, గని దేముడు తెంతో చి జతి సుద్ది తిలి ఆత్మయి అమ్ పాయ అస్సుమ్. 13 మాన్సుచి గ్యానుమ్ సికడ్డ కొడొ తెన్ నాయ్, ఆత్మ సమ్మందుమ్ జలి కారిమ్చి కామ్ ఆత్మ సమ్మందుమ్ జలి కారిమ్చి కామ్ సరి కెరన, ఆత్మ సికడ్డి కొడొ తెన్ ఈంజ సుద్ది తిలి ఆత్మ అమ్క సికడ్డిసి, అమ్ సికడ్డసుమ్.

14 లోకుమ్చొ సమ్మందుమ్ జల మాన్సు దేముడుచి సుద్ది తిలి ఆత్మచ కబుర్లు నెసి, దసచ జోక వెరిలెక అస్సె, జో అర్దుమ్ కెరనుక నెత్తె. దసచక ఆత్మతె జెర్మున్ తిలెకయి అర్దుమ్ కెరనుక జయెదె గని జోవయింక జా ఆత్మ నాయ్ చి నెత్తిర్తి. 15 ఆత్మ సమ్మందుమ్ జలోసొ మాన్సుల్క ఒండి అర్దుమ్ కెరనెదె, గని జోక కేన్ మాన్సు తీర్పు కెరుక నెత్తిర్తి.

16 † “ప్రబుచి పెట్టి తిలిసి జాన జోక సికడుక తెరిలన కో? అమ్క జలె క్రిస్తుచి మెన్సు అస్సె.”

3

ఆత్మక వడ్డిలన నెంజున్

1 బావుడ్లు, తుమ్చి తెన్ ‘ఆత్మక వడ్డిల మాన్సుల్ తెన్ కొడొ జలి రితి ఆవ్ కొడొ జంక నెత్తిర్లయి. ఈంజ లోకుమ్చ ఆగ్చన సమ్మందుమ్చ మాన్సుల్ మెనయ్, క్రిస్తుతె బాలబోదలీ’ మెన, తుమ్చి తెన్ కొడొ జంక తిలి. 2 అగ్గె తుమ్క సత్తు నాయ్ చి రిసొ రితి దూదు పియడ్లయ్, చి పోసిలయ్ గని చింబొ కవడ తుమ్క పోసి నాయ్. తుమ్ అప్పెక కి ఆగ్చచి సమ్మందుమ్చ రిత జా అస్సున్చి రిసొ అప్పెక కి తుమ్ వడితన్ నాయ్. 3 తుమ్చితె కుసిదుమ్, గోసల్ తిలె,

† 2:16 2:16 యెసయా 40:13.

తుమ్ ఆగ్చి సమ్మందుమ్చ మాన్సుల్చి రితి ఇండితన నెంజున్ గే? 4 ఎక్కిలో ఆవ్ పాపుల్చొ సుదొ, అన్నెక్లో ఆవ్ అపొల్లోచొ సుదొ, మెన సంగిలె పొది తుమ్ లోకుమ్చ సమ్మందుమ్ జల మాన్సుల్ నెంజున్ గే?

5 అపొల్లో కొన్సొ? పవులు కొన్సొ? సేవ కెర్తసయ్ గెద. ఎక్కిక్లక ప్రబు దిలిసి తెన్ జేవ్చి తెంతోయ్ తుమ్ నంపజలదు 6 ఆవ్ రోవిలయ్, అపొల్లో పాని సువిలన్, జియడ వడ్డయ్లోసా దేముడి. 7 జాకయ్, జియడ వడ్డయ్లో దేముడుతెయి గని, రోవిలోసాతె జలకి, పాని సువిలోసాతె జలకి కిచ్చొ కి నాయ్. 8 రోవిలోసాక పాని సూవిలోసాక ఎక్కి ఉద్దెసుమ్. ఎత్తి జిన జేవ్ కెర్లి కామ్చి కస్తుమ్కయ్ జితుమ్ నజనుల. 9 అమ్ దేముడు తెన్ బెద కామ్ కెర్తసుమ్; తుమ్ దేముడుచి పంటొ పికయ్లి బుయి, దేముడుచి గేరు జా అస్సున్.

ప్రబుచి ఆత్మగేర్చి టాలి

10 దేముడుచి దయక జో అంక దిలి ఇదిలి సెక్కిక, గేర్ బందుక చెంగిల్ జాన్లో బందితోసాచొ రితో జా, ఆవ్ పునాది తెయార్ కెర్లయ్, చి జేవ్చి ఉప్పిరి అన్నెక్లో గేర్ బందితయ్. జా పునాదిచి ఉప్పిరి తుమ్ ఎత్తిజిన తుమ్చి వాట కిసి బందితె గే జాగర్త తా. 11 ఎక్కి పునాదిచి ఉప్పిరి జా గేర్ బందిలెకయ్ జా గేర్ తయెదె; మెలె, యేసుక్రీస్తు జలి పునాదిచి ఉప్పిరి బందిలెకయ్. వేర పునాది తెయార్ కెరుక కో నెత్తిర్తి. 12 జలె, జా పునాదితె కో బజార్ తెన్, కో వెండి తెన్, కో వజ్రమానిక్యల్ తెన్, కో దారు తెన్, కో పెయ్యడి తెన్, కో పీరి తెన్ గేర్ బందిలె, 13 జేవ్ ఎక్కిక్ల బందిలిన్క 'తయెదె గే నాయ్ గే' ఆకర్కయ్ డీసెదె. ప్రబు సంగిలి వెల్లి దీసికయ్ డీసెదె. కిసి మెలె, ఆగిచి పరిచ్చుతె డీసెదె. ఎక్కిక్లచ కమె కిసచగె అగితె పరిచ్చు జలి రితి జా డీసెదె. 14 జో పునాది కెలోసాతె బందిలి కేన్ మాన్సుచి కామ్ జా పరిచ్చుతె జీనె, జో మాన్సుక బవుమానుమ్ దొర్కు జయెదె. 15 జో పునాదితె బందిలో కేన్ మాన్సుచి కామ్ డడ్డ గెచ్చెదె గే, జోక నస్తుమ్ తయెదె, గని జొయ్యి

రచ్చించుప జయెదె. గని ఆగి తెంతో కిసి గే ఉర్లి జలి రితి జా జో రచ్చించుప జయెదె.

నంపజలన ప్రబుచి దేముడుచి గుడి జవుల

16 దేముడుచి గుడి తుమ్ జస్తె మెన నేన్సు గే? జోచి ఆత్మ తుమ్చి పెట్టి అస్సె మెన నేన్సు గే? 17 జలె, దేముడుచి గుడి కో పాడ్ కెరెదె గే, జోక, జో దేముడుచి పాడ్ కెరెదె. కిచ్చొక మెలె, దేముడుచి గుడి జోకయ్ సుద్ది తంక అస్సె. జా దేముడుచి గుడి తుమి జా అస్సున్.

18 తుమ్క తుమ్ మోసిమ్ కెర నాయ్. ‘ఈంజ ఉగుమ్చి గ్యానుమ్క ఆవ్ తెలివి’ మెన కో ఉచరనెదె గే, పరలోకుమ్చి గ్యానుమ్ జో దొర్కు కెరంతి రితి ఈంజయ్ ఉగుమ్చి గ్యానుమ్క గవురుమ్ కెరుక ముల నేన్సొ రితి జవున్. 19 కిచ్చొక మెలె, ఈంజయ్ లోకుమ్చి గ్యానుమ్ దేముడుచి మొక్కె గ్యానుమ్ నెంజె. జో రెగ్డయ్లి కేన్ కోడుతె ఈంజ సత్తిమ్ డీస్తయ్ మెలె,

*“తెలివి తిల జోవయింప మోసిమ్లుతెయి దేముడు జేవ్ తెలివి మాన్సుల్క దెర

జేవ్ ఉచర్లిసి పిట్టయ్తయ్”

మెన రెగిడ్లి కోడు. 20 జోచి అన్నెక్ దస్సి కోడు కిచ్చొ మెలె,

†“ఈంజ లోకుమ్చి గ్యానుమ్క నంపజలనచి పెట్టి ఉచర్తనక

కామ్క నే జయె మెన ప్రబు జానె”

మెన రెగిడ్లి కోడు.

21 జాకయ్, కేన్ మాన్సుక ‘జొయ్యి వెల్లో’ మెలి రితి మాన్సుక గవురుమ్ కెర నాయ్. ఎత్కి తుమ్చి జా అస్సె. 22 పవులు కి, అపొల్లో కి, కేపా కి, అమ్ సికడ్డన తుమ్ ఎత్కిజిన్క దొర్కు జా అస్సుమ్. ఈంజ లోకుమ్ కి, జీవు కి, మొర్పు కి, ఈంజ ఉగుమ్ కి, జెతి ఉగుమ్ కి, ఎత్కి తుమ్చి జా అస్సె. 23 పడ్డె, తుమ్ క్రీస్తుచి తెడి అస్సున్, తుమ్క జొయ్యి ఎలుప కెర్తయ్; చి క్రీస్తు దేముడు అబ్బొన్చి తెడి అస్సె.

* 3:19 3:19 యోబు 5:13. † 3:20 3:20 కిర్తనలు 94:11.

4

అపొల్లోక చి పవులుక కీసి దెకుక

1 తుమ్ అమ్క కీసి దెకుక మెలె, యేసుక్రీస్తుచ సేవ కెర్తన ఆము. తుమ్ 'పాడ్ జంక నాయ్' మెన దేముడుచ గుట్టుల్ రకితన ఆమ్. అమ్ దస్సి జలిన్క తుమ్ మరియాద దెకుక తుమ్చి పూచి, 2 అన్నె, కేన్ జవున్ ఎజొమానిచి ఆస్తిక రకితొసా, జలె, నిదానుమ్ తెన్ నముకుమ్ జతొసా తంక జోచి పూచి. జాక, ఆమ్ దస్సి నిదానుమ్ తెన్ నముకుమ్ జతన జంక అమ్చి పూచి. 3 గని తుమ్ జవున్, మాన్సుచి కేన్ తీర్పు కెర్రి గేర్ జవున్, అంక పరిచ్చ కెర్ తీర్పు కెర్లె, అంక బాద నాయ్. ఆవ్ కి సొంత తీర్పు కెరనీ నాయ్. 4 దేముడుచి మొక్కె పూచి తెన్ జోచి కామ్ ఆవ్ కెర అస్సి. జా కామ్ కెర్లిన్తె ఆవ్ కిచ్చొ పొరపాట్ కెర్లిసి ఆవ్ నేని. గని అంక 'తప్పు జో నెంజె' మెన ఎక్కి అంచి సొంత కోడు రుజ్జు దెకవ నాయ్. జో ప్రబుయి అంక తీర్పు కెర్లొసా. 5 జాకయ్, జా సమయుమ్ నే జతె అగ్గె, మెలె, ప్రబు అన్నె నే జెతె అగ్గె, తుమ్ అంక తీర్పు కెర నాయ్. మాన్సుల్క దస్సి తీర్పు కెర్లిసి తుమ్ ముల. అందర్తె లుంకిల్ రితి తిలిసి ఎత్కి, మాన్సుచి పెట్టిద ఉద్దెసుమ్లు ఎత్కి జొయ్యి జోచి ఉజిడ్తె పరిచ్చ కెర తీర్పు కెరెదె. తెదొడ్కయ్ దేముడు సొంత ఎత్కిజిన్క జేవ్చ కెర్ల కమొ తీర్పుల్ సంగెదె.

6 అంచి రిసాచి అపొల్లోచి రిసా ఆవ్ ఇస టాలివొ కిచ్చొక సంగ అస్సి మెలె, తుమ్చి రిసా, బావుడ్లు, తుమ్క 'సిక్కుత్' మెనయ్, దేముడు రెగ్లయ్లిన్చి కంట కిచ్చొ వేరచి అమ్ దొగుల కిచ్చొ బెదవుమ్ నాయ్, దస్సి తుమ్ కి వేరచి జా బోదనతె బెదవ నాయ్. ఆవ్ అపొల్లో, జలె, అమ్ దొగుల నుబుమ్ కబుర్తె కిచ్చొ వేరచి బెదవుమ్ నాయ్, చి ఆమ్తె కక్క 'వెల్లొ' మెన తుమ్ సంగుక నాయ్. 'ఆవ్ వెల్లొ' మెన జవున్ ఆవ్ సంగి నాయ్, జో సంగి నాయ్. దస్సి తుమ్చితె కో కిచ్చొ వేరచి నే బెదయ్లె, తుమ్చితె కి 'ఆవ్ వెల్లొ, జో దాక్' మెన తేడల్ దెకన బులుక బెదె నాయ్. 7 జలె, తుమ్క దెకిలె, కక్క 'వెల్లొ' కక్క

‘దాకు’ మెనుక జతయ్ గే? దేముడు దిలి కంట తుమ్క కిచ్చొ అస్సె గే? దేముడు తెంతో పయిలిసి జలె, జా జొయ్యి నే దిలి రితి కిచ్చొక తుమ్ గవురుమ్ సంగితసు! ⁸ ‘ఎత్తితె సొమ్మారుమ్ జా అస్సుమ్’ మెన తుమ్ ఉచరంతసు. అమ్క పడ్డొ ముల తుమ్ రానల్ జా అస్సున్, జలె! తుమ్ నిజుమి ఏలుప కెర్తదు జలె, ఆమ్ కి తుమ్చి తెన్ ఏలుప కెరుక జతి! సర్ద జతమ్!

పావులీంసి నిస్కారుమ్ జలిన్

⁹ అమ్ క్రీస్తుచి సుబుమ్ కబుర్ సూనయత బారికుల్క మాన్సుల్ ఎత్తిచి కంట అమి నిస్కారుమ్ డీస్తసుమ్, *మొర్తి సిచ్చ కలుగు జల మూర్కుడ్లు రిత డీస్తసుమ్, మెన దేముడు సెలవ్ దిలి రితి అంక డీస్తయ్. అన్నె మాన్సుల్ జోవయింక దెక ఆస్తతి గే, అమ్ యేసుచ బారికుల్క కి లోకుమ్ ఎత్తిచ, జేవ్ దూతల్ జలెకి మాన్సుల్ జలెకి, ఆసిల్ రితి జతతి. ¹⁰ ‘క్రీస్తుచి సుబుమ్ కబుర్ సూనవుక ముక్కిమ్’ మెనయ్, ఆమ్ నేన్ల మాన్సుల్ రిత డీస్తసుమ్. తూమ్ మాత్రుమ్, క్రీస్తుచి తెడి బుద్ది సుదల్ జా అస్సున్, కిచ్చొ గే! తుమ్క ‘దస్సి ఉచరంతతి’ మెలి రితి డీస్తయ్, ఆమ్, జలె, సెక్తి నెంజిల్ రితి డీస్తసుమ్. అమ్కయ్ సెక్తి అస్సె మెన తుమ్క తుమి ఉచర్తసు. నిజుమి, మాన్సుల్ తుమ్కయ్ గవురుమ్ దెకితతి, అమ్కయ్ నిస్కారుమ్ దెకితతి. ¹¹ అప్పె ఎద ఆమ్ చువ్వె తన్నె అస్సుమ్. అమ్క సరిపుచుప జత పాలల్ నాయ్, మాన్సుల్ అమ్క పెట్టి తతి, అమ్క గెరల్ నాయ్. ¹² సొంత అత్తో తెన్ కామ్ కెర జితసుమ్. మాన్సుల్ అమ్క దూసుప కెర్లె, చెంగిల్ తత్తు మెన అమ్ ప్రార్దన కెర్తసుమ్. జేవ్ అమ్క అల్లర్ కెర్లె, ఓర్పుప జతసుమ్. ¹³ అమ్చి నావ్ జేవ్ కడ్లె, సెంతుమ్ కెర్తసుమ్. మాన్సుచి మొక్కె ఒండి లోకుమ్చి తొక్కు ఉన్దొ జా అస్సుమ్.

* **4:9** 4:9 మొర్తి సిచ్చ కలుగు జల మాన్సుల్ జోవయింక జా సిచ్చతె వట్టె గెతె తిలె పొది కీసి అన్నె మాన్సుల్ జోవయింక దెక ఆస్తతి గే, అమ్ యేసుచ బారికుల్క కి లోకుమ్ ఎత్తిచ, జేవ్ దూతల్ జలెకి మాన్సుల్ జలెకి, ఆసిల్ రితి జతతి.

14 ఇని మెన ఆవ్ తుమ్క కిచ్చొక రెగిడ్తసి మెలె, తుమ్క లాజ్ కెర్తి రిసా నాయ్, గని తుమ్ అంచ బోదల్ రిత జత, చి తుమ్క 'బుద్ది తిలి' మెనయ్ ఇని రెగ్గితసి. 15 కిచ్చొక మెలె, క్రీస్తుచి తెడి తుమ్క సికడ్తన ఒగ్గర్జన్ తిలె కి, జోవయించి తెడి ఒగ్గర్జన్క 'అబ్బొ' మెనుక నెతుర్పు. సుబుమ్ కబుర్ అవ్వి తొలితొ సూనయ్లి రిసా, క్రీస్తు జలో యేసుచి తెడి అవ్వి తుమ్క అబ్బొది జా అస్సి. 16 జాకయ్, 'అంకయ్ దెక సిక అంచి రితి ఇండ' మెన తుమ్క ఆవ్ బతిమాల్పు జతిసి. 17 జాకయ్ ప్రేమ తిలో నిదానుమ్ తిలో ప్రబుచి తెడి అంక పూత్తు జలో తిమోతిక తుమ్తె ఆవ్ తెద్రవ అస్సి. కిచ్చొక మెలె, ఆవ్ క్రీస్తుచి తెడి కీసి ఇండితసి గే, సంగుమ్లు ఎత్కితె కిచ్చొ బోదన కెర్తసి గే, తుమ్క జో ఉచార కెరయ్తి రిసా, తుమ్క 'ఉచార కెర బుద్ది తత్తు' మెనయ్.

18 ఆవ్ 'అమ్తె అన్నె జెయె నాయ్' మెన తుమ్చితె సగుమ్జన్ ఉచార పుల అస్సున్. 19 గని ప్రబు సెలవ్ దిలె, తుమ్తె బే బేగి జెయిందె, చి జేవ్ పులిల మాన్సుల్చ కొడెచి రిసా రుజ్జుల్ సూనుక నెసి, గని జోవయించి సెక్తిచ రుజ్జుల్ పరిచ్చ కెరిందె. 20 కిచ్చొక మెలె, దేముడుచి రాజిమ్ మాన్సుచి పెట్టి తిలిన్క కిచ్చొ రుజ్జు జయెదె మెలె, మాన్సుచ కొడె నాయ్, గని ప్రబుచి ఆత్మసెక్తి మాన్సు ఇండితి బుద్దితెయి డీసెదె, జయ్యి రుజ్జు జయెదె. 21 జలె, తుమ్చి ఇస్టుమ్ కిచ్చొ ఆవ్ అయ్లె, సిచ్చ కెర్తి డండో దెరన్లి రితి జెంక గే, ప్రేమ ముద్దు తెన్ జెంక గే? ప్రేమ ముద్దు తెన్ ఆవ్ అయ్లె సర్ద జస్తె, జలె, తుమ్ బుద్ది ఇండ.

5

లంజె జలో ఎక్కిలోచి రిసా పవులు తీర్పు సంగిలిసి

1 తుమ్చితె ఎక్కిలోక, అన్నెక్కోచి ఉపిరి జలె, 'లంజె వంసుమ్చొ జా జితయ్' మెన సంగితతి. అన్నె, జొయ్యి జతి రగుమ్, జలె, ప్రబుక నేన్ల మాన్సుల్ కి తెద్ది పాపుమ్ తెన్ జతి నాయ్! కీసి లంజె జా అస్సె మెలె, అబ్బొన్చి తేర్చి తెన్ లంజె జితయ్! 2 జలెకి, తుమ్ లాజు జసు

నాయ్, పుల అస్సున్! కీసి! జా పాపుమ్చి రిసా తుమ్ విసారుమ్ జతదు జలె, జతి! జా పాపుమ్ కెర్తొసాక తుమ్ దూరి కెర తుమ్చి తెన్ అన్నె బెదవన నాయ్.

³ ఆగుక, జలె, ఆవ్ తుమ్చి తెన్ నెంజిలె కి, ఆత్మక తుమ్చి తెన్ అస్సి. తుమ్చి తెన్ ఆవ్ పూర్తి తిలి రితి అస్సి. ⁴ జలె, దస్సి పాపుమ్ కెర్తొ జో మాన్సుచి రిసా ఆవ్ అప్పె కి తీర్పు ఉచర అస్సి. తుమ్ సంగుమ్తె బెదిలె పొది, ఆత్మక ఆవ్ కి తుమ్చి తెన్ బెదిల్ రితి జయిందె, చి యేసుక్రీస్తుచి సెక్తి తుమ్చి తెన్ తా, ⁵ జో మాన్సుచి ఆగ్ పాడ్ జతి రితి జోక నయ్తాన్చి అత్తి తుమ్ సార్పు కెర దాన; సిచ్చ జో జలె, ప్రబు జలో యేసు లోకుమ్చక తీర్పు కెర్తి జా ఆకర్ దీసిక జో మాన్సుచి ఆత్మయి రచ్చించుప జతయి.

అన్నె బుద్దుల్ చి రిసా తీర్పు సంగిలిసి

⁶ దస్సి పాపుమ్ కెర్లిన్చి రిసా 'అమ్చి సెక్తిక అమ్ ఇండితనుమ్' మెన తుమ్ పులిలిసి చెంగిల్ నాయ్. పొడియొ కెర్తి పాకుమ్తె పులయ్తి పీట్ ఇదిలిదిల్ తిలె కి, ఒండి పాకుమ్ పులెదె మెన నేన్సు గే? ⁷ అగ్గెచి పాపుమ్ కెర్లి బుద్దిచి తుమ్ గెచ్చవన గెల; తుమ్ సుద్ది జతి రిసా, *పాపుమ్ గెచ్చయ్లి గుర్తుచి పస్కా పండుగు మెండపిల్ల రిత, క్రీస్తు అమ్చి పాపుమ్ గెచ్చయ్తి అర్పితుమ్ జలి తెంతో తుమ్క 'సుద్ది జల' మెన దెకితయ్. ⁸ జాకయ్, జా పండుగు కెర్లి రితి జా, జో అమ్క సుద్ది కెర్లిన్చి రుజ్జు డీస్తి రితి ఇండుమ. అమ్చి ఆత్మక పాడ్ కెర్తి అగ్గెచి బుద్ది, మెలె మూర్కుమ్ బుద్ది, పాపుమ్బుద్ది, అమ్క గార్ కెరెదె, చి జా పొన. జా పులయ్తి పీట్ నెంజిలి పాకుమ్తె బెదితి నిదానుమ్ సత్తిమ్ జా సుద్ది జమ.

⁹ 'లంజెచ మాన్సుల్ తెన్ బెద నాయ్' మెన అగ్గెచి ఉత్తుమ్తె తుమ్క రెగిడ్లయ్. ¹⁰ మాములుమ్ ప్రబుక నేన్ల ఈంజ లోకుమ్చ లంజె జలన, ఆసల్ జలన, చోర్లు, బొమ్మల్క జోకర్తనచి రిసా సంగి

* 5:7 5:7 పస్కా పండుగు దీసి యేసు అమ్చి పాపుమ్ గెచ్చయ్తి అర్పితుమ్ జలన్.

నాయ్. దస మాన్యుల్ తెన్ ఎద్దరె నే బెదుక జలె, ఈంజ లోకుమ్క పూర్తి ములయ్ తయెదె. ¹¹ కిచ్చో అర్దుమ్ తెన్ దస్సి రెగిడ్లయ్ మెలె, కో జలెకు 'నంపజలస' మెనన్లొసొ లంజె జతోసొ, ఆసల్ జతోసొ, బొమ్మల్క జొకర్లొసొ జలె, మాన్యుక దూసెనల్ కెర్లొసొ జలె, మత్తిలొసొ జలె, చోరు జలె, దసొచొక తుమ్ బెదవన నాయ్. జోవయింతెన్ అన్నిమ్ కి కెర నాయ్. ¹² జలె, నంపజలస్ నెంజిలసక తీర్పు కెరుక అంచి కామ్ నెంజె. గని ప్రబుచి సంగుమ్తె బెదిలసకయ్ తీర్పు కెరుక, మాత్తుమ్, సంగుమ్చ తుమ్ నంపజలసచి పూచి. ¹³ సంగుమ్తె నే బెదిలసక తీర్పు కెర్లొసొ దేముడు, గని

†“తుమ్చి తెన్ బెదిలొ కొన్సొ జలెకు పాపుమ్ కెర్లొసొ జలె, తుమ్తె తెంతొ ఉదడ గెల”
మెన ప్రబు జోచయ్ జల మాన్యుల్చి రిసొ పూర్ణమ్ రెగ్లయ్లి తీర్పుకోడు అస్సె.

6

నంపజలస తీర్పు కెర్తి గేర్చ తగు కెరుక పొన

¹ తుమ్చితె ఎక్కిలొక ఎక్కిలొ జట్టి జొ తిలె, నంపజలసచి ముక్కె నే గెతె, కిచ్చొక ప్రబుక నంప నెంజిలసతె జోవయించి తీర్పు కెర్తి గేర్తె తగు కెర్తను? జొ తప్పు. ² నంపజలస ఒండి లోకుమ్చక తీర్పు కెరుల మెన నేన్సు గే? ఒండి లోకుమ్చక తుమ్ తీర్పు కెరుక అస్సె జలె, ఇస ఇదుద్ల తగుల్ తుమ్ సంగుమ్తె సూనుక నెతుర్పు గే? ³ దూతల్క కి అమ్ తీర్పు కెరుక అస్సె మెన కి నేన్సు గే? దస్సి కెరుమ్దే జలె, ఈంజయ్ లోకుమ్చ తగుల్ సూనుక అమ్క అన్నెయ్ అదికారుమ్ అస్సె.

⁴ జలె, తుమ్క ఈంజ లోకుమ్తె తగుల్ తిలె, కిచ్చొక ప్రబుచి సంగుమ్క కామ్క జెత మాన్యుల్చి మొక్కె నే సూనయ్తె వేర మాన్యుల్చ తగుల్తె కుట్టయ్తను? ⁵ తుమ్క లాజ్ నాయ్ గే? ప్రబుక

† 5:13 5:13 ద్వితీయోపదేశ కాండుము 17:7, 19:19, 22:21, 24 చి 24:7.

నంపజల తుమ్ బావుడ్లుతె కో బుద్ది మాన్సు తయె నాయ్ గే, చి జోచి మొక్కె సూనయ్లె జో తగు కుట్టవుక నెంజె గే? ⁶ జలె, తుమ్ నంపజలస బావొక బావొ తగుల్ కెర్తసు, చి ప్రబుక నంపనెంజిలసక వెసడ్తును! ⁷ అన్నె కిచ్చొ మెంతసి మెలె, ఎక్కిలోక ఎక్కిలో తుమ్ తగు కెర్లె, నంపనెంజిల మాన్సుల్ దెకిలె తుమ్క ఆసుల. తుమ్ నంపజలసచి నావ్ దెకెదె. దస తగుల్ జతి కంట మాన్సుల్ తుమ్క కెర్త తప్పుల్ ఓర్పువ జంక చెంగిలి, మోసిమ్ జంక చెంగిలి. ⁸ తుమ్చ సొంత బావుడ్లుక కి తుమ్, ఎక్కిలోక ఎక్కిలో పాపుమ్ కెర మోసిమ్ కెర్తసు.

సుద్ది నెంజిలస దేముడుచి రాజిమ్తె బెదుక నెంజె

⁹ సుద్ది నెంజిల మాన్సుల్ దేముడుచి రాజిమ్తె బెదుక నెంజె మెన నేన్సు గే? తుమ్ మోసిమ్ జా నాయ్. పెండ్లి నే జతస, జలస లంజెకమొ కెర్తస, బొమ్మల్క జొకర్తస జలెకు, మున్సుబోదల్ తెన్ మున్సుబోదల్, తేర్బోదల్ తెన్ తేర్బోదల్ లంజె జతస జలెకు, ¹⁰ చొర్లు జలెకు, డబ్బుల్క ఒగ్గర్ ఆస జతస జలెకు, మత్వాలల్ జలెకు, మాన్సుల్క దూసువ కెర్తస జలెకు, మాన్సుల్క బియడ లాబుమ్ కెరంతస జలెకు, దేముడుచి రాజిమ్తె బెదుక నెత్తిర్తి. ¹¹ తుమ్ అగ్గెయి దస మాన్సుల్ జా తిలదు, గని ప్రబు జలో యేసుక్రీస్తుచి నావ్ తెన్, చి దేముడుచి సుద్ది తిలి ఆత్మతె తుమ్ దోయి జా, ప్రబుచయ్ జా, పాపుమ్ నే కెర తిలి రితి సుద్ది జలదు, చి తుమ్క 'పున్నిమ్ జల' మాన్సుల్ జా అస్సున్.

¹² జలె, "అంక ఇస్టుమ్ జలిసి కేన్ కి కెరుక అంక అక్కు అస్సె, గని సగుమ్ కమొ కెర్లె చెంగిల్ నాయ్. అంక ఇస్టుమ్ జలిసి కేన్ కి కెరుక అంక అక్కు అస్సె, గని కిచ్చొ అలవాట్క గొతిమాన్సు రితి అవ్ జా తయందె.

¹³ "అన్నిమ్ మాన్సుచి పేట్కయ్, పేట్ అన్నిమ్కయ్" మెన సంగితమమ్, చి ఆకర్క దొన్ని కి ప్రబుయి గెచ్చవ గెలెదె. గని, మాన్సుచి ఆగ్ లంజె జతి రిసొ నెంజె గని ప్రబుచి రిసొయి, దస్సి

ప్రబు ఆంగీచి రిసాయి. 14 అన్నె, యేసుప్రబుక దేముడు అబ్బొసి అన్నె జియణ్ణో, చి జోచి సెక్తి అమ్క కి జియడెదె. 15 క్రీస్తుచి ఆంగీక తుమ్చ ఆంగీ వాటల్ జవుల మెన తుమ్ నేన్ను గే? జేవ్ దస్సి జలె, క్రీస్తుచ వాటల్ కడ గెల కెర సానిక బెదవుక బెదెదె గే? నెంజె! 16 సాని తెన్ కో బెదెదె గే, జా తెన్ ఎక్కి ఆంగీ జతయ్ మెన నేన్ను గే? కిచ్చొక మెలె, *“జేవ్ దొగుల ఎక్కి ఆంగీ జా తవుల”

మెన దేముడుచి కొడతె రెగ్గయిలయ్ అస్సె. 17 గని, ప్రబు తెన్ కో బెద అస్తి గే, జో తెన్ ఎక్కి ఆత్మయి జా తవుల. 18 జాకయ్, లంజెకమొ దూరి కెరన. దసితె ఎద్గరె బెద నాయ్. మాన్సుల్ కెర్తి అన్నె ఎత్తి పాపుమ్, జలె, జోచి ఆంగీక దూరి అస్సె, జోచి ఆంగీక బయిలె అస్సె, గని కో లంజె జయెదె గే, జోచి సొంత ఆంగుక పాపుమ్ కెర పాడ్ కెర్తయ్.

19 తుమ్చి ఆంగీ, తుమ్చి పెట్టి తిలి దేముడు దిలి జోచి సుద్ది తిలి ఆత్మక గుడి జా అస్సె మెన తుమ్ నేన్ను గే? తుమ్క తుమి ఇస్టుమ్ అయ్లె రితి ఏలుప్ర కెరనుక తుమ్క అదికారుమ్ నాయ్. 20 దేముడు ఒగ్గర కరీదీక తుమ్క †గెన అస్సె. జాక, తుమ్చి ఆంగీ తెన్ జోక గవురుమ్ కెర్తి రితి తుమ్ సుద్ది తెన్ ఇండ.

7

పెండ్లి జతిన్ చి నే జతిన్

1 జలె, తుమ్ రెగ్గ పునిలిన్క జబాబుల్ రెగిడిందె. పెండ్లి నే జా తిలొ మున్నుబోద, జలె, తేర్బోదక నే చడ్లె చెంగిలి. 2 గని జో మాన్సు పెండ్లి నే జా తిలె, నయ్తాన్ ఉచర్తిసి రితి లంజెకమొ నే కెరవుక మెన, ఎత్తి మున్నుబోదక సొంత తెర్పి తిలె, ఎత్తి తేర్బోదక సొంత మున్నుసి తిలె చెంగిలి.

3 మున్నుసి తేర్పిక జోచి పూచి తిలిసి దెంక, తేర్పి మున్నున్క జేవ్చి పూచి తిలిసి దెంక. 4 కిచ్చొక మెలె, జాచి సొంత ఆంగీక ఇస్టుమ్ అయ్లె రితి ఏలుప కెరుక తేర్పిక అదికారుమ్ నాయ్; మున్నుసి

* 6:16 6:16 ఆదికాండుమ్ 2:24. † 6:20 6:20 మెలె, జోవయింబి లొయి సువ జోవయింబి పాపుమ్ పుంచ నయ్తాన్చి రాజమ్ తెంతొ జోవయింక నెతొవన అస్సె.

ఏలుప కెర్తయ్. దస్సి, జోచి సొంత ఆగ్గక ఇస్తుమ్ అయ్లి రితి ఏలుప కెరుక మున్సున్క అదికారుమ్ నాయ్; తేర్చి ఏలుప కెర్తయ్.

5 తుమ్తె కేన్ జవున్ దొగుతెర ఎక్కి ఉద్దెసుమ్ ఉచర ప్రార్దన నిదానుమ్ కెర్తి రిసాయి గడియకయ్ ఎక్కిలోక ఎక్కిలో దూర్ జా తంక జయెదె, నెంజిలె పొన. గని ప్రార్దన కెర్తి జా కామ్ కెర కేడయ్లదు మెలె, అన్నె మాములుమ్ బెద, నెంజిలె తుమ్ *ఆగ్గక ఆసక ముద్దొ కెర నెతిర్లె, సయ్తాన్ తుమ్క పాపుమ్ కెరవుక ఉచరెదె. 6 ప్రార్దనల్చి రిసా గడియ అంక తంక జయెదె మెన కిచ్చొక సంగితసి మెలె, ఆడ్ర నెంజె, గని దస్సి కెరుక చెంగిల్ జయెదె. 7 అన్నె, తుమ్ ఎత్తిజిన్ అంచి రితి పెండ్లి నెంతె తత్తదు జలె, 'చెంగిలి' మెన్తయ్, గని ఎత్తి మాన్సుక దేముడు దిలి వరుమ్ జోకయ్ తయెదె; ఎక్కిలోక ఏక్ వరుమ్, అన్నెక్కోక అన్నెక్ వరుమ్ దా అస్సె.

8 పెండ్లి నే జలసక చి రండెల్ మాన్సుల్క ఆవ్ కిచ్చొ మెంతసి మెలె, 'అంచి రితి జేవ్ దస్సి తిలె జోవయింక చెంగిలి'. 9 గని, జేవ్ ఓర్పుప జంక నెతిర్లె, పెండ్లి జతు. కిచ్చొక మెలె, ఒగ్గర్ ఆగ్గ ఆసక వడ్డితి కంట పెండ్లి జంక చెంగిలి.

10 పెండ్లి జలసక కిచ్చొ ఆడ్ర దెతసి మెలె; ఆవ్ నాయ్, గని ప్రబుచి ఆడ్ర ఈంజ; తేర్చి మున్సున్క ములుక నెంజె. 11 గని ఏక్ వేల ముల దిలె, దస్సి తవున్, నెంజిలె మున్సున్ తెన్ అన్నె బెదున్. పడ్డొ మున్సుసి తేర్చిక ములవుక పోని.

12 తుమ్తె అన్నె సగుమ్జిన్క కిచ్చొ మెంతసి మెలె; ప్రబు సంగిలిసి నెంజె, గని అవ్వి సంగితసి. ప్రబుక నంపజిలో కేన్ బావొచి తేర్చి ప్రబుక నంపనెంజిలిసి జయెదె గే, జా 'జో తెన్ జియిందె' మెన్తయ్ జలె, జో జాక ములుక నెంజె. 13 దస్సి, కేన్ నంపజిలి తేర్బోదచొ మున్సుసి నంపనెంజిలోసా జలె, 'జా తెన్ జియిందె' మెన జో సంగిలె, జా కి జోక ములుక నెంజె. 14 కిచ్చొక మెలె, నంపజిలి తేర్చిచి సుద్దిచి రిసా, నంపనెంజిలో మున్సుసి కి సుద్ది జయెదె, చి నంపజిలో

* 7:5 7:5 ఆగ్గక ఆసక ఓర్పుప జంక నెతిర్లె

మున్నున్చి సుద్దిచి రిసా నంపనెంజిలి తేర్చి కి సుద్ది జయెదె. నెంజిలె, తుమ్చితె దస్సి జల కుటుంబల్చ బోదల్ సుద్ది జత నాయ్. గని అప్పె సుద్ది జా అస్తి.

15 గని జేవ్ దొగుతెరతె నంపనెంజిలో మున్నుసి జలెకు నంపనెంజిలి తేర్చి జలెకు ములుక కోర్ప జతయ్ జలె, ములుసు. దస్సి జా తిలె, నంపతిలోసా జవున్ నంపతిలిసి జవున్ మున్నున్ తెన్ గే తెర్చి తెన్ గే తంక పూచి నాయ్. కిచ్చొక మెలె, 'సెంతుమ్ తెన్ జితు' మెనయ్ ప్రబు అమ్క బుకారా అస్సె. 16 నంపనెంజిలో మున్నుసి తుచి తెన్ తత్తో జలె, మున్నుది ప్రబుక నంపజా రచ్చించుప జతి రితి తుయి జోక సికడుక తెరితది గే నెత్తిర్ది గే నేస్సి. దస్సి, నంపనెంజిలి తేర్చి, మున్నుబోద తుచి తెన్ తత్తి జలె, జా నంపజా రచ్చించుప జతి రితి సికడుక తెరితది గే నెత్తిర్ది గే, నెసి. జాకయ్ తుమ్ సిచ్చ కెరన నాయ్.

ప్రబు బుకార్లి పొది కిసి తిలె, దస్సి తంక

17 ప్రబుచ సంగుమ్లు ఎత్కిచి రిసా కిచ్చొ ఆడ్ర కెర అస్సి మెలె, కేన్ మాన్సుక ప్రబు కిచ్చొ వరుమ్ దా అస్సె గే, జో మాన్సు జయ్యి వరుమ్ రితి జింక. కిసి జింక మెన దేముడు జోక బుకారా అస్సె గే, దస్సి జింక. 18 ప్రబు బుకార్లి పొది కో యూదుల్చి గుర్తుచి సున్నతి కెరన తిల గే, జా గుర్తుచ మచ్చల్ గెచ్చవుక పోన. ప్రబు బుకార్లి పొది కో జా గుర్తు కెరన తతి నాయ్ గే, కెరనుక ఉచర్తు నాయ్. 19 కిచ్చొక మెలె, దేముడుచ కొణొ రితి ఇండుకయ్ ముక్కిమ్. 20 ప్రబు బుకార్లి పొది కిసి తిల గే, ఎత్కి మాన్సు దస్సి తంక. 21 ప్రబు బుకార్లి పొది గొతిమాన్సుల్ జా తిలదు గే, బాద నాయ్. విడ్డల్ జంక వాటు తిలె, విడ్డల్ జా. కిసి తిలె కి, బాద నాయ్. 22 కిచ్చొక మెలె, గొతిమాన్సు తిలి పొది ప్రబు బుకార్లిసా జలె, ప్రబుచి తెడి †విడ్డల్ జలొసా జతయ్. దస్సి కి, విడ్డల్ తిలి పొది కక్క ప్రబు బుకారా అస్సె గే, జో క్రిస్తుచొ గొతిమాన్సు

† 7:22 7:22 నయ్తాన్చి రాజమ్ తెంతో విడ్డల్ జలొసా.

జతయ్. 23 క్రీస్తుచి లోయి తెన్ దేముడు †తుమ్క గెన అస్సె. జాక, మాన్సుచి ఇస్టుమ్ రితి తుమ్ ఇండుక నాయ్. 24 జాకయ్, బావుడ్లు, ప్రబు బుకార్లి పొది కీసి ఎత్తి మాన్సు తిలదు గే, దేముడుచి తెడి దస్సే తత్తు.

పెండ్లి నే జలనచి జలనచి రిసా సంగిలిసి

25 పెండ్లి నే జలనచి రిసా, జలె, ప్రబు అంక కిచ్చొ ఆడ్ర దెయె నాయ్, గని ప్రబు అంక నంప అస్సె, జోవయించి దయ అంచి ఉప్పిరి అస్సెచి రిసా నిదానుమ్ అస్సె, చి ఆవ్ ఉచర్తిసి ఆవ్ సంగిందె. 26 కిచ్చొ ఆవ్ ఉచర్తిసి మెలె, అప్పె జెత అల్లర్చి రిసా దస్సే తంక చెంగిలి. 27 కేన్ మున్సుబోద తెర్చి ఆన తిలె, విడ్డల్ జంక ఉచర్చు నాయ్. తెర్చి నే ఆన తిలె, పెండ్లి జంక ఆన జవున్ నాయ్. 28 గని ఏక్ వేల పెండ్లి కెరన్లె పాపుమ్ నెంజె. దస్సి తేర్బోద కి పెండ్లి కెరన్లె పాపుమ్ నెంజె. గని పెండ్లి జలనక ఈంజ లోకుమ్చ బాదల్ తయెదె. దన బాదల్ తుమ్ సేడుక అంక ఇస్టుమ్ నాయ్.

29 బావుడ్లు, కిచ్చొక ఇసి మెన ఆవ్ సంగితసి మెలె, అప్పె తెంతో ఆకర్ దీసి ఎద తొక్కి సమయుమ్ అస్సె. జాకయ్, తెర్చి ఆన్లన అప్పె తెంతో తెర్చి నే ఆన్లి రితి ప్రబుచి కామ్కయ్ నిదానుమ్ జితు. 30 'కిచ్చొ జలెకి, ప్రబుచి కామ్ ముక్కిమ్' మెనయ్, ఏడ్డన నే ఏడ్డిసి రితి జితు, సర్ల తెన్ తిలన సర్ల నెంజిల్ రితి జితు. ఆస్తి గెన్లన కీసి జింక మెలె, కిచ్చొ నెంజిలి రితి జితు. 31 అన్యె, ఈంజ లోకుమ్తె తిలిసి వాడిక కెర్తన కీసి జింక మెలె, దస్సిచిక దెర్చు నే సేడ్డి రితి జితు. అప్పె సంగిలిసి ఎత్తి కిచ్చొక మెలె, ఈంజ లోకుమ్చి రితి తిలిసి ఎత్తి పూర్తి పాడ్ జా గెతిసి.

32 'తుమ్చి మెన్సుతె ఈంజ లోకుమ్చ బాదల్ తత్తు నాయ్' మెనయ్ తుమ్చి రిసా అంచి ఆన. పెండ్లి నే జలొ మున్సుబోద, జలె, ప్రబుచ కమొచి రిసా మెన్సు దెతయ్, ప్రబుచ ఆసల్ కెరుక ఆన జతయ్. 33 పెండ్లి జలొ మున్సుబోద ఈంజయ్ లోకుమ్చ కమొచి

† 7:23 7:23 నెంజలె, 'సయ్తాన్చి రాజిమ్ తెంతో తుమ్క నెతోవన అస్సె'.

రిసాచి తేర్చిచ ఆనల్ జర్గు కెరుక అల్లర్ జతయ్. ³⁴ చి జోవయింక దొన్ని మెన్నుల్ తత్తయ్. దస్సి, పెండ్లి నే జలి తేర్బోద గే, ఉబెడి గే జలె, ప్రబుచ కమొచి రిసా మెన్ను దెతయ్, ఆఁగుక కి ఆత్మక కి సుద్ది తంక, ప్రబుక ఎక్కి నిదానుమ్ తంక ఆన జతయ్. గని పెండ్లి జలి తేర్బోద, జలె, ఈంజ లోకుమ్చ కమొచి రిసా కి, మున్నున్చ ఆనల్ జర్గు కెరుక కి అల్లర్ జతయ్. ³⁵ ఈంజ ఎత్తి తుమ్క కిచ్చొక ఆవ్ సంగితసి మెలె, తుమ్క 'చెంగిల్ తత్తు' మెనయ్ సంగితసి. తుమ్క జాడు వయడ్డి రిసా నాయ్, గని బుద్దివాటు దెకయ్తి రిసాయి. తుమ్క 'ప్రబుక ఎక్కి మెన్ను నిదానుమ్ జతు' మెన అంచి ఆన.

³⁶ జోక దెంక సంగ తిలి నాడిక ఎక్కిలో నే ఆన్లె, ఆనక ఓర్పువ జంక నెత్తిరై, రకనుక నెత్తిరై, పెండ్లి జతి జోచి ఇస్తుమ్ కెరన్ను. పెండ్లి జంక పాపుమ్ నెంజె. ³⁷ గని, కక్క మెన్ను డిట్టుమ్ తిలె, జో ఓర్పువ జంక తెర జోచి ఆన రకనుక తెరై, జా దుయిన్క మింతున్ జా, నే ఆనుక దయిరిమ్ తిలె, దస్సి తాఁ గెలె, చెంగిలి. ³⁸ జాక, జో సంగ తిలి దుయిన్క కో పెండ్లి జలె చెంగిలి, గని కో పెండ్లి జయె నాయ్ గే, జోక ఒగ్గర్ చెంగిలి.

³⁹ మున్నుసి జివు తిలె ఎద, తేర్చి జోకయ్ తంక. గని మున్నుసి మొర గెలె, జా ఇస్తుమ్ జలోసాక పెండ్లి జంక జయెదె; గని ప్రబుచి సెలవ్ రితి జలెకయ్. ⁴⁰ జా దస్సి తాఁ గెలె, జాకయ్ చెంగిలి, మెన ఆవ్ ఉచర్తసి. దేముడుచి సుద్ది తిలి ఆత్మ కి దస్సి మెన అంచి పెట్టి సికడ్డయ్ మెన ఆవ్ ఉచర్తసి.

8

బొమ్మల్క దిలిసి కతిన్చి రిసాచి కోడు

¹ జలె, బొమ్మల్క దిలి అన్నిమ్చి రిసా ఉచరుమ. తుమ్ తుమ్చి ఉత్తమ్తె రెగిడ్లి రితి 'అమ్ ఎత్తిజిన్క గ్యానుమ్ అస్స' మెన జానుమ్. గని 'గ్యానుమ్ మాన్సుక పులయ్తయ్' మెన కి జానుమ్. ప్రేమయ్, మాత్తమ్, మాన్సుక డిట్టుమ్ కెర్తయ్. ² "అంక గ్యానుమ్

అస్సె” మెన కో ఉచరంతయ్ గే, జో జానుక ముక్కిమ్ తిలిసి జో అప్పెక నేనె. ³ గని, దేముడుక కో ప్రేమ కెర్తయ్ గే, జో దేముడు జోకయ్ జానె.

⁴ జాకయ్, బొమ్మల్క అన్నిమ్ దిలిన్చి రిసా ఉచర్లె, ఈంజ లోకుమ్చ ‘బొమ్మల్క కిచ్చొ జివు నాయ్’ మెన జానుమ్, అన్నె, ‘జీవ్ తిలొ దేముడు ఎక్కిలొయి అస్సె. అన్నెకోయి నాయ్’ మెన కి జానుమ్.

⁵ మెలె, అన్నెక్ లోకుమ్తె కి బూలోకుమ్తె కి ఒగ్గర్ వేర వేర వస్తువల్క ‘దేముడ్లు జతతి’ మెన మాన్సుల్ సంగితతి. నిజామి మాన్సుల్క కిచ్చొ కిచ్చొ ‘దేముడ్లు’ ‘ప్రబులు’ ఒగ్గర్ జతతి. ⁶ మాన్సుల్ దస్సి సంగిలే కి, అమ్క ఎక్కిలొయి దేముడు. కొన్సొ మెలె, ఎత్కికయ్ అబ్బొ జలొ దేముడు. జో ఎత్కి జెర్తుయిలొసా, చి జోచి రిసాయి అమ్ ఎత్కిజిన్ జితనుమ్. పడ్తె అమ్క ఎక్కిలొ ప్రబు. కొన్సొ మెలె, యేసుక్రీస్తు. *జోచి అత్తి ఎత్కి జెర్తున్ జలి, జోయ్యి అంక జెర్తుయలన్ చి రిసా అమ్ జితనుమ్.

⁷ జలెకి, ‘బొమ్మల్క సెక్తి నాయ్’ మెన సగుమ్జిన్ అప్పెక నేన్తి; జా గ్యానుమ్ జేవ్క నాయ్. సగుమ్జిన్ అగ్గె తెంతో బొమ్మల్క జొకరుక అలవాట్ జా తిల, చి ‘బొమ్మల్క దిలిసి అమ్ నంపజలన కయ్లె అమ్క పాడ్ కెరెదె’ మెన బితతి, చి జోవయించి మెన్సుతె బమ్మ జవుల. కయ్లె, ‘గార్ జలమ్, పొరపాట్ జలమ్’ మెన ‘మెన్సుక పాడ్ జలమ్’ మెన నిస్కారుమ్ దెకనుల.

⁸ అమ్ కతిసి, జలె, దేముడుక పాసి ఆనె నాయ్, దూరి కెరె నాయ్. నే కయ్లె నస్టుమ్ నాయ్ కయ్లె లాబుమ్ నాయ్. ⁹ గని, కిచ్చొచి రిసా తుమ్ జాగర్త తంక మెలె, ‘కంక జయెదె’ మెన తుమ్ ఇస్టుమ్ అయ్లి రితి కెర్లె, ఏక్ వేల † మెన్సు డిట్టుమ్ నెంజిలొ అన్నెక్లొ నంపజలన తుక దెక, జో కి పడ్తె కయ్లె, ‘తప్పు కెర్తయ్’ మెన ఉచరన ఉస్సుర్ జయెదె, చి జోచి మెన్సుతె జో పొరపాట్ కెర్లి రితి జయెదె. ¹⁰ దస్సి తుమ్చితె కో జలెకు కేన్ జవున్ బొమ్మచి గుడితె వెన బలి దిలిసి కయ్లె, ఆత్మక డిట్టుమ్ నెంజిలొ నంపజలన కో జలెకు జోక ఒత్త దెకిలె, ‘జో గ్యానుమ్

* 8:6 8:6 యోహాను 1:1-4 దెక. † 8:9 8:9 రోమియల్ 14 అద్యయిమ్, ముక్కిమ్క 14:13-23 దెక.

తిలోసా కతయ్, ఆవ్ కి కయ్లె బాద నాయ్, కిచ్చొగ్ మెన దయిరిమ్ నెంజ, దయిరిమ్ జా జో కి కయ్లె, 'వేర దేముడ్లుక దిలిసి కయ్లయ్. క్రీస్తుక ములిల్ రితి జతయ్' మెన జో పడ్డొ బమ్మ జయెదె. ¹¹ దస్సి జలె, జో మాన్సుక 'పాపుమ్ తెంతొ రచ్చించుప జవున్' మెనయ్ క్రీస్తు మొర తిలె కి, తుమ్చి 'గ్యానుమ్' చి రిసాయి ఆత్మక డిట్టుమ్ నెంజిలో జో మాన్సు జోచి ఆత్మతె పాడ్ జలి రితి జయెదె. ¹² దస్సి, జేవ్ ఆత్మక డిట్టుమ్ నెంజిలసచి ఆత్మ పాడ్ కెర తుమ్ పాపుమ్ కెర, క్రీస్తుక కి పాపుమ్ కెర్లి రితి జతసు. ¹³ జాకయ్, ఆవ్ ముక్కల్ జవున్ కతిసి జలెకు బావొ జలో కేన్ జవున్ నంపజలసక †పాపుమ్ కెరయెదె జలె, ఆవ్ ముక్కల్ కయి నాయ్!

9

ప్రబు నిసాన్లోచి రిసా పవులు రుజ్జు జలిన్

¹ అంక పరిచ్చ కెర్తసు జలె, క్రీస్తుచి తెడి ఆవ్ విడ్డల్ జలోసా నెంజి గే? జోచి చి రిసా జోచొ బారికి ఆవ్ జయి నాయ్ గే? అమ్చొ ప్రబు జలో యేసుక ఆవ్ సొంత దెకుక నాయ్ గే? తుమ్ ప్రబుచి తెడి ఆవ్ మార్సుప కెర్తసచి పలితుమ్ తుమ్ నెంజున్ గే? ² ఆవ్, 'ప్రబుచొ బారికి నెంజె' మెన వేర మాన్సుల్ అంచి రిసా ఉచర్లె కి, దసొచొ ఆవ్ తిలిన్క తుమ్ సాచుల్ జస్తె. ప్రబుచి బారికి కామ్క జో అంక నిసాన్లిసి. కిచ్చొతె రుజ్జు జతయ్ మెలె, తుమ్ ప్రబుచి తెడి తిలిసి, అంచి అత్తి జోచి రిసా నూన నంపజలదు, అంక జో దిలి కామ్ తుమ్చితెయ్ జెయిమ్ జలి.

³ అంక పరిచ్చ కెర్తసక అంచి జబాబ్ ఈంజయి. ⁴ ప్రబుచి ఈంజ కామ్ కెర్తస, కంక పింక విలువ నాయ్ గే, నాయిమ్ నాయ్ గే, బెదె నాయ్ గే? ⁵ ప్రబుచ బావుడ్సొ చి *కేపా చి ప్రబుచ అన్నె బారికుల్చి రితి అమ్ తెర్ని ఆన అమ్చి పట్టి కడ నెంక అమ్క విలువ నాయ్ గే? ⁶ ప్రబుచ బారికుల్ మొత్తుమ్తె ఎక్కి బర్నబా చి ఆవ్, జలె, అత్తో తెన్

† 8:13 8:13 8:9 దెక, చి రోమియల్ 14:23.

* 9:5 9:5 మెలె, 'పేతురు'.

కామ్ కెర కెరయ్ జింక ములుక విలువ నాయ్ గే? ఎక్కి అమ్మి కామ్ కెర కెరయ్ జింక ములుక విలువ నాయ్ గే? ⁷ జమాను సుదొ సొంత గెరిచి డబ్బుల్ ఆనన జమాన్లుచ కామ్ కెరెదె గే? కో ద్రాసత్తేట గల కెర ఒత్తచ కాయల్ జో కంక నెంజె గే? మంద రకితో గొప్పడు మందచి దూదు నే పితె కో తవుల? ⁸ ఆవ్ మాన్సు అద్వీ కెరయ్ ఇసి సంగితసి గే? దేముడుచ †మోసే పూర్గమ్చొచి అత్తి రెగ్డయ్ల దేముడుచ ఆగ్గుల్ కి ఇసి సంగితతి. ⁹ †“గిడ్డల్ కెల్నె సుదయ్తె పొది సుదయ్తో బెయిలుచి మూంతి బందుక పొన” మెన మోసే పూర్గమ్చొచి అత్తి రెగిడ్డి దేముడుచి ఆగ్గుల్తె ఇసి రెగ్డవ అస్సె. జలె, ఎక్కి బెయిలల్ చి రిసా జో ఉచర్తయ్ గే? ¹⁰ కచితుమ్ అమ్చి రిసాయ్ ఈంజ కోడు సంగితయ్ మెన ఆవ్ నంపజతసి. కిచ్చొక మెలె, కేస్త్రాసా కేసిలె, పంటొ లాయితోసా పంటొ లాయిలె, జో కి ఈంజొ కి ‘పంటొచి వాట నజనుక జయెదె’ మెన ఆన తెన్ తవుల, నజనుక విలువ జవుల. ¹¹ అమ్, జలె, తుమ్చితె ఆత్మచి బిఁ గల అస్సుమ్ మెలె, అమ్క తుమ్ కిచ్చొ జవున్ దెంక నెంజె గే? అమ్క కిచ్చొ జవున్ వాట జెంక బెదె నాయ్ గే? ¹² ప్రబుచి కామ్ కెర్ల వేర మాన్సుల్ తుమ్చితె వాట నజనుక విలువ తిలె, అమ్ అన్నె విలువ జము నాయ్ గే? అమ్మి తొలితో తుమ్క సుబుమ్ కబుర్ సూనయ్లమ్, గెద. జలె, జా నజనుక అమ్ విలువ జలెకి, జా అమ్ నజనుక నాయిమ్ తిలె కి, అమ్క జెతిసి నజనుమ్ నాయ్. ప్రబుచి సుబుమ్ కబుర్ తుమ్ సూన్తిన్క కిచ్చొ అడ్డు కెరుక నెన కెర, కిచ్చొ కస్టుమ్ కి ఓర్పుప జమ్దె.

¹³ దేముడుచి గుడిచి కామ్ కెర్ల సేవ కెర్తన, జలె, దేముడుచి గుడిచి జేవ్చి వాట నజ కతతి. బలిచి కామ్ కెర్ల సేవ కెర్తన జా బలి దిలి టాన్తె దెతిసి జోవయించి వాట నజ కతతి మెన నేన్సు గే? ¹⁴ దస్సి, “సుబుమ్ కబుర్ సూనయ్తన జోవయించి జా కామ్చి రిసొచి వాటక జితు కతు” మెన ప్రబు ఆడ్ర దిలన్.

† 9:8 9:8 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్డయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకుమ్తె రెగ్డయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గమ్చొచి అత్తి రెగిడ్డి దేముడుచ ఆగ్గుల్ మెన రగ్డవ అస్సె. † 9:9 9:9 ద్విత్వీయాపదేశ కాండుము 25:4.

15 జలెకి దస్సి ఆవ్ కిచ్చొ జలెకి నజనుక నాయిమ్ తిలె కి, ఆవ్ నజనుక నాయ్. చి 'దస్సి తోడు దొర్కు కెరనుక ఉచరయ్ ఉత్తల్ రెగిడ్డయ్' మెన తుమ్ అంచి రిసా ఉచర నాయ్. కిచ్చొక మెలె, 'ఆవ్ నజీ నాయ్' మెన ఆవ్ గవురుమ్ సంగితిన్క కో అడ్డు కెర్తి కంట మొరుక కి సర్ద జయిందె.

16 సుబుమ్ కబుర్ నూనయ్తి రిసా కిచ్చొ గవురుమ్ నజనుక బెదె నాయ్. కిచ్చొక మెలె, జా సుబుమ్ కబుర్ నే నూనయ్లె నెంజె, అయ్యె! ఆవ్ సుబుమ్ కబుర్ నే నూనయ్లె, అంక నస్తుమ్! 17 ఎక్కి అంచి సొంత ఇస్టుమ్కయ్ ఈంజ కామ్ కెర్తయ్ జలె, 'జో కెర్లి రిసా జోవయింక బవుమానుమ్ దెంక అస్సె' మెనుక జతి. గని ఆవ్ ఈంజ కామ్ కెర్తిసి ఎక్కి ఆవ్ ఇస్టుమ్ జలిసి నెంజె. ఆవ్ ఈంజ కామ్ కెరుక మెన ప్రబు అంక పూచి కెర అస్సె. కిచ్చొ దొర్కు జలెకి, నే దొర్కు జలెకి, ఈంజ కామ్ కెరుకయ్ అంచి పూచి. 18 జలె, అంచి బవుమానుమ్ కిచ్చొ మెలె, సుబుమ్ కబుర్ నూనయ్తి రిసా ఆవ్ నజనుక విలువ తిలిన్క ఆవ్ ఆస నే జతె, 'తుమ్క ఆరి దొర్కు జవున్' మెనయ్ ఆవ్ కిచ్చొ నే నజితె, తుమ్క జాడు వయడుక నెస కెర, డబ్బుల్ గట్ట నే నజితె ఆరి బోదన కెర్తసి.

ఎత్తి రగల్ మాన్యుల్క సుబుమ్ కబుర్ నూనవుక

19 దస్సి, ఆవ్ కేన్ మాన్యుచొ గొతిమాన్యు నెంజిలె కి, ఒగ్గర్జిన్క 'ప్రబుక నంపజా రచ్చించుప జతు' మెనయ్ అంచి సర్దక ఎత్తిజిన్క గొతిమాన్యు రితో జా, అస్సి. 20 'యూదుల్ నంపజతు' మెన, యూదుడు రితో జలయ్. మెలె, పూర్గుమ్ మోసేచి అత్తి దేముడు దిల ఆగ్గుల్క బితసక 'నంపజతు' మెనయ్, దేముడు మోసే తెన్ దిలి ఆగ్గుల్క బితోసా రితో జలయ్. ఆవ్ జా అలవాట్ తెంతో ఆత్మక విడ్డల్ జా తిలె కి. 21 దేముడు మోసే తెన్ దిలి ఆగ్గుల్ రితి నే కెర్తసక, మెలె యూదుల్ నెంజిలసక, జలె, 'జేవ్ కి ప్రబుక నంపజా రచ్చించుప జతు' మెనయ్, యూదుడు నెంజిలో రితో జలయ్. మెలె, దేముడుక నిదానుమ్ తా, జోచి కోడ్ రితి నిదానుమ్ ఇండితె తిలయ్,

గని క్రీస్తు సంగిలి ఆగ్నల్చి రితి, §'ప్రేమయ్ ముక్కిమ్' మెనయ్, జోచి ప్రేమ తెడి అమచ యూదుల్చ ముక్కిమ్ నెంజిల దేముడు మోసే తెన్ దిలి ఆగ్నల్చి జాడు యూదుల్ నెంజిలసక వయడి నాయ్. ²² ఆత్మక డిట్టుమ్ నెంజిలసక 'జేవ్ కి ప్రబుక నంపజా రచ్చించుప జతు' మెనయ్, 'బమ్మ కెర్లె అన్మానుమ్ జవుల' మెనయ్, జోవయింక బమ్మ నే కెర్లి రిసా జోవయించొ రితో జలయ్. 'కిసి జలె సగుమ్జిన్కయ్ జవున్ రచ్చించుప కెరిందె' మెనయ్ జోవయించ విడ్డల్క, ఆత్మల్క నిస్కారుమ్ నే దెకితె, ఎత్కిజిన్క మరియాద దెక అస్సి. ²³ 'ఎత్కిజిన్ సుబుమ్ కబుర్ సూన్తు, నంపజా రచ్చించుప జతి అవ్కానుమ్ నజన్తు' మెనయ్, పడ్డో, 'నంపజలస ఎత్కిజిన్ తెన్ ఆవ్ కి సుబుమ్ కబుర్ తెచ వరల్తె బెదిందె' మెనయ్.

పరలోకుమ్చి బవుమానుమ్

²⁴ కేన్ జవున్ నిగితి కెల్తితె ఒగ్గర్ జిని నిగుల, గని ఎత్కిచి కంట బే బేగి నిగితోసా ఎక్కిలో జినెదె, చి జోకయ్ బవుమానుమ్ దొర్కు జయెదె మెన తుమ్ నెసు గే. పరలోకుమ్చి బవుమానుమ్ దొర్కు కెరంతి రిసా తుమ్చితె ఎత్కి మాన్సుకి నిదానుమ్ నిగ జిన. ²⁵ నిగిత కెర్లయ్తె బెదితస, జలె, జోవయించి ఆగ్ డిట్టుమ్ జతి రితి, ఆగుక ఎత్కి రగల్ కచితుమ్ ముద్దో కెరుక సికనుల. జేవ్ దస్సి సిచ్చు రితి కెరంతిసి కిచ్చొక మెలె, ఆరి పాడ్ జతి ఈంజయ్ లోకుమ్తె బెదితి బవుమానుమ్ దొర్కు కెరనుక. ఆమ్, మాత్తుమ్, కిచ్చొక కచితుమ్ ముద్దో కెరంతసుమ్ మెలె, పాడ్ నే జతి పరలోకుమ్చి బవుమానుమ్కయ్. ²⁶ ఆవ్ కేనె గెతసి గే పాచ్చిల్ రితి నిగి నాయ్. వాదు తెన్ పొరాటుమ్ జలి రితి నే జయి, దెబ్బ కేనె నే లయితి రితి కెల్లి నాయ్. ²⁷ అంచి ఆగుక ఆవ్ ముద్దోచి బుద్ధి సికయ్తసి కెర్తసి, అంచ ఆసల్క ముద్దో కెరంతసి. నెంజిలె, తొలితో వేర మాన్సుల్క బోద కెర సికడ తిలె కి, ఏక్ వేల అవ్వి ఓడుప జలె, కెద్ది తప్పు జయిందె. అంక

§ 9:21 9:21 మత్తయి 22:37-40, యోహాను 13:34-35, 15:12, 17.

జైతికయ్ జా బవుమానుమ్ నజన్తి అవ్కాసుమ్ ఆవ్వి పిట్టవన్లె, కెద్ది పాపుమ్!

10

యూదుల్చి రితి పొరపాల్ జతిన్తె తుమ్ కెరుక నాయ్

1 తుమ్ కిచ్చొక జాగర్త తెన్ తంక మెలె, బావుడ్లు, అమ్చ పూర్గమ్చ కిసి జల గే, ఉచరుమ. తుమ్ పచ్చ నాయ్. ఉచర్లె, కామ్క జెయెదె. దేముడు జోవయించి పురె ఇండయ్లి *మబ్బుచి ఎట్టో జేవ్ ఎత్తిజిన్ వెల్లి బయిలె బులై తిల, †సముద్రుమ్చి బుయి వాట్ జేవ్ ఎత్తిజిన్ సముద్రుమ్తె ఇండ గెల. 2 దస్సి, మబ్బుచి పట్టి ఇండ, సముద్రుమ్ దస్సి డేవ, మోసే తెన్ బాప్తిసుమ్ నజన్లి రితి జల. 3 ఎత్తి ఎక్కి †ఆత్మ అన్నిమ్ కయ్ల, 4 ఒండిజిన 5 ఆత్మ సమ్మందుమ్ జలి పాని పిల. ఆత్మ సమ్మందుమ్ జలి రంగ్వి తెంతో నుచి జలిసి పాని జేవ్ పిల. జో ఆత్మ రెంగ్వి కొన్సొ మెలె, *క్రీస్తు. 5 దస్సి జలెకి, జోవయింతె ఒగ్గర్జిన్చి ఇండిలిసి రిసా అమ్చొ దేముడుక సర్ద తయె నాయ్. అన్సె, జా వెల్లి బయిలె జేవ్ †పాపుమ్తె గెతికయ్, దేముడు సంగ తిలి దేసిమి జేవ్ నే పావితె మొరుక మెన జో సిచ్చ దిలన్.

6 జలె, జేవ్ ఆన జలి రితి ఆమ్ ఆన జంక నాయ్ మెలె, అమ్క బుద్ది సికితి రితి జా ఎత్తి అమ్క కిచ్చొ కామ్క జెయెదె మెలె, అమ్క జాగర్త దెకయ్తయ్.

7 †“ప్రెజల్ కంక పింక వెన, నచుక ఉట్టిల”

మెన జేవ్ సగుమ్జిన్ పాపుమ్ జా బొమ్మక జొకర్తిన్చి రిసా దేముడుచి కొడొతె రెద్దవ అన్సె. జా పాపుమ్ తుమ్ కెరుక పొన. 8 పడ్డె,

* 10:1 10:1 నిర్గమకాండుమ్ 13:21, 14:19. † 10:1 10:1 నిర్గమకాండుమ్ 14:16. ‡ 10:3 10:3 నిర్గమకాండుమ్ 16 అధ్యాయమ్. § 10:4 10:4 నిర్గమకాండుమ్ 15:22-25, 17:5-6. * 10:4 10:4 యోహాను 4:10-14. † 10:5 10:5 నిర్గమకాండుమ్ 14:20-24, 28-35, ద్విత్వీయాపదేశ కాండుము 1:34-40. ‡ 10:7 10:7 నిర్గమకాండుమ్ 32 అధ్యాయమ్. ముక్కిమ్క 32:2-6.

జోవయింతె కీబగ్గర్ జిని లంజె జా ఎక్కె దీంసి విస్సెక్ తిన్ని వెయిల్ జిని మొర గెల. అమ్ నంపజలన్ జా పాపుమ్ కెరుక నాయ్. ⁹ పడ్డొ, జోవయింతె సగుమ్జిన్ దేముడు ప్రబుక కొంకడ్డి రితి పాపుమ్ కెర్ల, చి జో *అయివొ తెద్రయ్తికయ్, చడ్ల, చి జయ్యి సిచ్చు జల. ప్రబుక అమ్ నంపజలన్ పరిచ్చు కెర్లి రితి కొంకడుక నాయ్. ¹⁰ పడ్డొ, జో దేముడు ప్రబు తోడు తిలె కి, జోవయించి రిసొ కోపుమ్ జతె తిల, చి మొరయ్తోసొ దేముడుదూతచి అత్తి జేవ్ మొర గెల.

¹¹ జోవయింతెచ మాన్సుల్క జేవ్ సిచ్చల్ కిచ్చొక కామ్క అయ్లి మెలె, జోవయింక 'జాగర్త తెన్ తత్తు' మెన రుజ్జుల్ దెకయ్లి. పడ్డొ, జో దేముడు కిచ్చొక జా ఎత్కిచి రిసొ దేముడుచి కొణెతె రెగ్గయ్లో మెలె, అమ్ ఉగుమ్చి ఆకర్తె జిత మాన్సుల్క 'సిక్కుతు' మెనయ్ రెగ్గవ అస్సె. ¹² జాకయ్ కో 'ఆవ్ చెంగిల్ అస్సి' మెన ఉచరంతయ్ గే, పాపుమ్తె దెర్ను నే సేడ్డి రితి జాగర్త దెకన్ను. ¹³ తుమ్క దెరుక జెత పాపల్ అగ్గెయ్ తెంతొ మాన్సుల్క దెర్తతి, కిచ్చొ నొవచ నెంజితి, గని దసచతె తుమ్ దెర్ను నే సేడ్డి రితి తుమ్ కిచ్చొ దయిరిమ్ తంక జయెదె మెలె, దేముడు నిదానుమ్ తతోసొ, చి సత్తిమ్ ఇండుక తుమ్క ఇన్లుమ్ తిలె, సయ్తాన్ తుమ్క పాపుమ్ కెరయ్తి రితి దేముడు సెలవ్ దెయె నాయ్. తుమ్ జా పాపుమ్ నే కెర్లి రితి తుమ్క దొర్కు జలి సెక్తి దెయెదె, కేన్ సమయుమ్క సయ్తాన్ దస్సి అల్లర్ కెరుక జెయెదె గే, తుమ్ ఓర్పువ జా జినుక తెరితి రిసొ విడ్డల్ జతి వాటు జో దేముడు దెకయెదె.

బొమ్మల్క జొకర్తిన్చి రిసొ జాగర్త సంగిలిసి

¹⁴ ప్రేమ తిల బావుడ్లు, బొమ్మల్క జొకర్తిన్క దూరి తా, దసితె బెద నాయ్. ¹⁵ తుమ్క 'బుద్ది తిలస' మెన ఆవ్ తుమ్క ఇసి సంగితసి. ఆవ్ అప్పె సంగితిన్చి రిసొ తుమ్ సొంత చెంగిల్ ఉచర. ¹⁶ 'తుయి దిలిసి ఈంజ' మెన ప్రబుచి నావ్ తెన్ అమ్ జొబర కెర ద్రాచ రస్సుమ్

§ 10:8 10:8 సంక్యాకాండుము 25:1-9. * 10:9 10:9 సంక్యాకాండుము 21:4-9.

పిలె, జోచి నూయి జలి లోయిచి రిసా దొర్కు జలి రచ్చనతె అమ్ బెదిలిన్చి గుర్తు జయెదె. జోచి నావ్ తెన్ అమ్ పోడి గండల్ కెర కయ్లె, జోచి ఆగ్ మొర అమ్చి పాపుమ్ జో వయ్లిన్తె అమ్ బెదితి గుర్తు జతయ్. 17 జా ఎక్కి పోడి కతి ఎక్కి గుర్తు అమ్ ఎత్తిజిన్ నంపజలన్క తసుమ్చి రిసా, అమ్ ఒగ్గర్జిన్ జలెకి, జా ఎక్కి పోడి కయ్లి రిసా, అమ్ క్రిస్తు తెన్, ఎక్కిలో తెన్ ఎక్కిలో ఎక్కి ఆగ్ జా అస్సుమ్.

18 పూర్ణమ్చి రితి దేముడుక బలి దెత అమ్చ ఇస్రాయేలుల్చి రిసా ఉచర. జా బలి దిలిసి కయ్లె, జా కతన ఎత్తిజిన్ జా బలి దిలిన్తె బెదిలి గుర్తు జతయ్. 19 జలె, బొమ్మక దిలి కిచ్చొ బలిక కిచ్చొ సెక్తి అస్సె గే? బొమ్మక కిచ్చొ సెక్తి తయెదె గే? కిచ్చొ నాయ్. 20 కిచ్చొ మెంతసి మెలె, దేముడుక నేన్ల మాన్సుల్ బలి దెతిసి కక్క దెతతి మెలె, దేముడుక నాయ్, గని బూతల్కయ్. తూమ్ బూతల్క జొకర, జోవయింతెన్ బెదుక అంక ఇస్టుమ్ నాయ్! 21 కిచ్చొక మెలె, ప్రబు తెన్ బెద పిలి పణ్ణె, బూతల్ తెన్ బెద పింక ఎద్దెరె బెదె నాయ్. ప్రబుచి అన్నిమ్ చి బూతల్చి అన్నిమ్ ఎక్కిలో మాన్సు కో జలెకు కంక బెదె నాయ్. దొన్ని బెదితి నాయ్. 22 దస్సి జలె, ప్రబుక అమ్ కొంకడ కొప్పుమ్ కెరుక జయెదె గే? నెంజె, గెద. జోచి కంట అమ్క సెక్తి గే? నాయ్ గెద.

నంపజలన్క అక్కు

23 జలె, “కిచ్చొచి రిసా కి ‘గార్’ మెనుక నెంజె” మెన సంగితసుమ్. జా నిజుమ్, గని అమ్ సగుమ్ కమొ కెర్లె, అన్నె మాన్సుల్క చెంగిల్ తయె నాయ్. “కిచ్చొచి రిసా కి ‘గార్’ మెనుక నెంజె” మెన అమ్ నంపజలన్ సంగితసుమ్ గని సగుమ్ కమొ కెర్లె, మాన్సుచి నమ్ముకుమ్క చెంగిల్ కెరె నాయ్. 24 కో నంపజలన్ సొంత లాబుమ్క ఆస జతు నాయ్, గని అన్నె మాన్సుల్కయ్ ‘చెంగిల్ జతు’ మెనయ్, ఆస తెన్ తంక.

25 తుమ్చి మెన్సు నే కెరతె, నే పునితె కటికి సుదొతెచి ముక్కల్ గెనుక జలె, ‘బలి దిలిసి జయెదె గే నెంజె గే?’ మెన నే బితె, లాజ్

నెంతె గెన్ను కంక జయెదె. ²⁶ కిచ్చొక మెలె, దేముడుచి కొణెతె రెడ్డయ్యలి రితి, “లోకుమ్ కి, లోకుమ్తె తిలిసి కి, ఎత్తి ప్రబుచి” మెన రెగిడ్డిసి సత్తిమ్.

²⁷ పణ్ణె, ప్రబుక నంపనెంజిలో కేన్ మాన్సు తుమ్క అన్నిమ్క బుకార్లె, ఇస్టుమ్ తిలె, గెచ్చు, చి కిచ్చొ లాజ్ నెంతె కిచ్చొ నే పుసితె, జో కిచ్చొ దెయెదె గే, కా. ²⁸ గని “ఈంజ బొమ్మక బలి దిలిసి” మెన తుమ్క కో జాకు సంగిలె, ‘జేవ్ జా కయ్లె జోక పాపుమ్ కెరవ తయిందె చి అంక పాపుమ్ అయెదె’ మెనయ్ జో మాన్సు సత్తిమ్క తుమ్క జాగర్త సంగిలిన్చి, సత్తిమ్ జోక పిట్టున్ నాయ్ మెన, జో అన్మానుమ్ నే జతి రిసా జా కా నాయ్. ²⁹ తుమ్చి పెట్టిచి సత్తిమ్ తతి రిసా నాయ్, గని సత్తిమ్కయ్ జో మాన్సు తుమ్క సంగ తయెదె, చి జో అన్మానుమ్ నే జతి రిసాయి తుమ్ కా నాయ్. ‘కంక నెంజె’ మెన వేర మాన్సుల్చి మెన్సు తెన్ అంక కిచ్చొక తీర్పు జర్గు జయెదె. ³⁰ ‘ప్రబు దిలో’ మెన ఆవ్ సర్ల తెన్ జా కయ్లె, కో మాన్సుల్ అంక నింద కెరుక తెరితి గే? నెత్తిర్తి. ప్రబుచి నావ్ తెన్ జోబర సంగ కెర ఆవ్ కయ్లె, జాచి రిసా అంక కో నింద కెరుల? ³¹ గని కంక జలెకి, పింక జలెకి, కిచ్చొ కామ్ కెరుక జలెకి, దేముడుచి గవురుమ్ దెకయ్తి రితి కెర. ³² యూదుల్ జవున్, గ్రీసు దేసిమ్చ జవున్, దేముడుచి ఆగ్ జతి సంగుమ్ జత నంపజలన్ పొరపాట్ నే జతి రితి తుమ్ కిచ్చొ అడ్డు కెర నాయ్. ³³ అంచి సొంత లాబుమ్ పోని, గని ఎత్తిజిన్క ‘జేవ్ రచ్చించుప జా చెంగిల్ జతు’ మెనయ్, కిచ్చొ కామ్ తిలె కి ఆవ్ ఎత్తిజిన్క మరియూద కెర్తి రితి ఇండితసి.

11

సంగుమ్లుతె కిన్ తంక గే

¹ ఆవ్ క్రీస్తుక దెక కిసి ఇండితసి గే, తుమ్ కి అంక దెక దస్సి ఇండ.

² అంక తుమ్ కెర్టొడి తెదొడి ఉచార కెర్తసు, చి రిసా బావుడ్లు, ఆవ్ నూనయ్లి రితి, అమ్ నంపజలసక దిలిసి తుమ్ కెర్తసు, చి రిసా అంక

సర్దు. ³ అమ్మచ మున్నుబోదల్ ఎత్తిజిన్క *బోడి కొన్సొ మెలె, క్రిస్తు. పడ్డొ, ఎత్తి తేర్బోదక బోడి కొన్సొ మెలె, మున్నుసి. పడ్డొ క్రిస్తుక బోడి కొన్సొ మెలె, దేముడు మెన తుమ్ జాననుక అస్సె.

⁴ కేన్ మున్నుబోద బోడి డంకనయ్ ప్రార్దన కెర్లె జవున్, దేముడుచ కబుర్లు సంగిలె జవున్, జోచి బోడిక నిస్కారుమ్ కెరంతయ్. ⁵ కేన్ తేర్బోద బోడి నే డంకింతె ప్రార్దన కెర్లె జవున్ దేముడుచ కబుర్లు సంగిలె జవున్, జాచి బోడి నిస్కారుమ్ కెరంతయ్; జాచి బోడి బోడల్లి రితి జతయ్. ⁶ కీసి మెలె, తేర్బోద బోడి డంకనుక నెసిలె, జాచి నెండి కత్రవన్లెకయ్ చెంగిలి, గని నెండి బోడనుక జవున్ కత్రవనుక జవున్ నెంజె మెలె, బోడి డంకనయ్ తంక.

⁷ కిచ్చొక ఇసి సంగితసి మెలె, మున్నుబోదక జెర్మయ్లి పొది, “అంచి పొలిక అంచి గవురుమ్ ఇన్నెతె డీసున్” మెన, దేముడు జెర్మయ్లన్. గని తేర్బోద జలె మున్నుబోదచి గవురుమ్ దెకయ్తయ్. ⁸ కిచ్చొక మెలె, మొదొల్క మున్నుబోద తేర్బోద తెంతొ జెర్మన్ జయె నాయ్. మున్నుబోద తెంతొ తేర్బోద జెర్మన్ జలి. ⁹ తేర్బోదక తోడు తతి రిసొ మున్నుబోద జెర్మయ్ జయె నాయ్, గని మున్నుబోదక తేర్బోద తోడ్ తతి రిసొయి తేర్బోదక జెర్మవ అస్సె. ¹⁰ జాకయ్, దూతల్ కి దెకితతి రిసొ, తేర్బోదచి ఉప్పిర్చొ మున్నున్చి అదికారుమ్చి గుర్తు దెకయ్తి రిసొయి జా తేర్బోద బోడి డంకనుక అస్సె.

¹¹ జలె ప్రబుతె మున్నున్క అంగ తేర్బోద నాయ్, తేర్బోదక అంగ మున్నుబోద నాయ్. క్రిస్తుచి తెడి తేర్చిక మున్నుసి తోడు, మున్నున్క తేర్చి తోడు అస్సి. ¹² తొలితొ తేర్బోద మున్నుబోదచి తెంతొ జెర్మన్ జలెకి, అప్పె తేర్బోదచి పెట్టి మున్నుబోద జెర్మితయ్. మున్నుబోదల్ కి, తేర్బోదల్ కి, ఈంజ లోకుమ్తె తిలిసి ఎత్తి కి దేముడు జెర్మయ్లొ. ఎత్తిచి మొదొల్ దేముడు. ¹³ తుమ్ సొంత తీర్పు ఉచర. బోడి నే డంకింతె తేర్బోద దేముడుక ప్రార్దన కెరుక సూటి గే? ¹⁴ ఒండి

* 11:3 11:3 ఎవెసు 1:22-23, 4:15-16, 5:23. కొల్స్సియల్ 1:18, 2:10.

లోకుమక దెకిలె, 'మున్నుబోదచి సెండి దీగు జా తిలె నూటి నాయ్' మెన నేనుమ్ గే? 15 'తేర్బోదక సెండి దీగు తిలె జాక గవురుమ్' మెన నేనుమ్ గే? కిచ్చొక మెలె, జాక మరియాద తెన్ డంకితయ్. దస్సికయ్ దేముడు జాక దిగిల్ సెండి దా అస్సె. 16 ఈంజ కోడుచి రిసా కో జలెకు వేర సికడుక ఉచర్తయ్ గే, తుమ్ కిచ్చొ జానుక మెలె, కిచ్చొ వేర రిత కెరుక నెంజె మెన ఒప్పన్, పడ్డొ ప్రబుచ సంగుమ్లు ఎత్తితె ఇసి కెర్తతి.

ప్రబుచి ఆగ్చి లొయిచి గుర్తు తిలి పొడి, ద్రాచ రన్నుమ్

17 వేరచి రిసా తుమ్క మెన్నక జతయ్ జలెకి, ఏక్ కోడుచి రిసా అంచి విసారుమ్ ఆవ్ సంగుక అస్సె. కిచ్చొచి రిసా మెలె, ప్రబుచి నావ్ తెన్ తుమ్ సంగుమ్తె సబ కెరుక బెదిలె, కామ్క జెతికయ్ బుద్ది తెన్ నాయ్, గని కామ్క నెంజిలి బుద్ది తెన్ బెదితను. 18 కిచ్చొ బుద్దిచి రిసా ఆవ్ సంగితసి మెలె, ఎక్కి, 'సంగుమ్' మెన తుమ్ బెదితి పొది ఎక్కి మెన్ను తెన్ నాయ్. జల్లు జలి రితి జతను, మెన తుమ్చి రిసా ఆవ్ నూస అస్సి. జా కోడు ఇదిల్ నంప కెరుక జతయ్. 19 తుమ్తె కో సత్తిమ్ అస్తి గే, కో నాయ్ గే చినితి రిసా దస జల్లు తంకయ్ మెన ఏక్ వేల తుమ్ ఉచర్తను గే? దస్సి ఉచరుక పిట్టె నాయ్.

20 తుమ్ బెద సబ కెర్తి పొది పొడి చి ద్రాచ రన్నుమ్ కయ్లె పిల్లె, 'యేసుప్రబు దిలి అన్నిమ్ ఈంజ' మెన తుమ్ సంగిలే కి, దస్సి మెనుక నెంజె. 21 కిచ్చొక మెలె, తుమ్ సొంత ఆన్నిసి కక్క నే దెతె, సొంత జాయి గెతను, చి సగుమ్జిన్క నెంజ తా జోవయింక పెట్టి బెరె నాయ్. చి సగుమ్జిన్ మచ్చు గెతతి! 22 అబ్బువోమ్మ! తుమ్క గెరల్ నాయ్ గే, చి నే జెతె అగ్గె చూ తాన్ గెచ్చవంతి రితి గెరి కంక పింక నెంజె గే? నెంజిలె, ప్రబుచి సంగుమ్తె బెదిలసక నిస్కారుమ్ ఉచర, జోవయింతె నెంజిలసక నిస్కారుమ్ కెరుకయ్ మెన దస్సి కెర్తను గే? తుమ్క ఆవ్ కిచ్చొ సంగిలె జయెదె? దస్సి కామ్చి రిసా తుమ్క 'చెంగిల్ కెర్తతి' మెన ఆవ్ సంగుక బెదెదె గే? నాయ్, గెద, బెదె నాయ్! నెంజె!

23 ప్రబుతె అంక దొర్కు జలిన్చి రిసా, ఆవ్ తుమ్కయ్ సార్పు కెర దిలిసి కిచ్చొ మెలె, జోక విరోదుమ్ సుదల్చి అత్తి సార్పు కెర దిలి జా రాతి, యేసుప్రబు పోడి దెర, 24 దేముడు అబ్బొన్క జోబర సంగ ప్రార్దన కెర, మోడ కెర, “ఈంజ, తుమ్చి రిసా †బలి జతి అంచి ఆగుక గుర్తు. ఈంజ కెర అంక ఉచార కెర కెయక కంక, అంచి రిసాయి ఉచర్తె తా” మెన ప్రబు సిస్సుల్క దిలన్. 25 జా అన్నిమ్ కయ్లి వడ్డె, ద్రాచ రస్సుమ్చి గలన్ దెర ప్రార్దన కెర, “ఈంజ గలన్చి రస్సుమ్ కిచ్చొ గుర్తుచి రిసా మెలె, అంక సంపజతనచి పాపుమ్ పుంచితి అంచి లోయిచి గుర్తు ఈంజ. ఈంజ, అంచి నోవి ప్రమానుమ్ జర్గు జతిన్చి గుర్తు. ఈంజ కెర అంక ఉచార కెర కెయక పిలెకి, అంచి రిసాయి ఉచర్తె తా” మెన సంగ పియడ్లన్. 26 కిచ్చొక మెలె, జా పోడియె కెయక కయ్లె, జా ద్రాచ రస్సుమ్ కెయక పిలె, ప్రబు మొర అర్చితుమ్ జలిన్చి గుర్తు దెకయ్తను, సాడుప కెర్లి రితి జతను. జో ఈంజ లోకుమ్తె అన్నె జెతె ఎదక జయ్యి గుర్తు దెకయ్తె తా.

27 జలె, కిచ్చొ వేర బుద్ది తెన్ కో జా పోడియె కయ్లె, జా ద్రాచ రస్సుమ్ పిలె, ప్రబుచి ఆగుక జోచి లోయిక దూసుప కెర్లి రితి, విలువ నే దిలి రితి, పాపుమ్ వయుల. 28 జాకయ్, కేన్ మాన్సు జా పోడి కయెదె గే, జా లోయి పియెదె గే, తొలితో జోక జోయ్యి పరిచ్చ కెరన, సిలువతె ప్రబు జర్గు కెర్లి కామ్ ఉచరయ్ కవున్ పివును. 29 కిచ్చొక మెలె, ‘ప్రబుచి ఆగుచి గుర్తు, జోచి లోయిచి గుర్తు ఈంజ’ మెన సరిగా నే ఒప్పన్తె కో ఈంజ కవుల గే, పివుల గే, జో సిచ్చకయి జాకపియ జా పాపుమ్ వయనుల. 30 దస్సికయ్ తుమ్చితె ఒగ్గర్జిన్ చెంగిల్ నెంతె జబ్బుల్ జా అస్సున్, చి సగుమ్జిన్ కి మొర గెచ్చ అన్తి.

31 అమ్ సొంత పరిచ్చ కెరన బుద్ది కెరంతె తత్తమ్ జలె, ఇన సిచ్చల్ జతె తత్తమ్ నాయ్. 32 గని ప్రబు అమ్క అప్పె సిచ్చ కెర్లె, కిచ్చొక జా సిచ్చ కెర్తయ్ మెలె, అమ్క “అప్పె సిక్కుత్, చి ఈంజ లోకుమ్చి రితి

† 11:24 11:24 నెంజిలె, ‘గండల్ జలి’ బలి జలి

కెర్తనక లయితి జా ఆకర్ దీసిచి జా వెల్లి సిచ్చ జతు నాయ్.” మెనయ్, ప్రబు అమ్క రచ్చించుప కెర్తయ్.

33 జాకయ్, బావుడ్లు, జా పోడి కంక, జా రస్సుమ్ పింక తుమ్ బెదిలె, బమ్మ నే జతె ఎక్కిలోక ఎక్కిలో రక. 34 నెంజిలె, కిచ్చొ ఆస బుద్ది తెన్ కయ్లె పిల్లె, తీర్పు జా ప్రబుచి సిచ్చ జస్తె. కక్క చూ తిలె, గెరి అన్నిమ్ కెర్పు. వేర ఇన ఆడ్రల్, జలె, తుమ్చితె అయ్లె సంగిమ్దె.

12

ప్రబు దెత సెక్తివరల్

1 అన్నె మాన్సుల్చి పెట్టి ప్రబు దిల జోచి ఆత్మ దా సెక్తి వరల్చి రిసా తుమ్ నేన తంక, అంక ఇస్టుమ్ నాయ్. 2 తుమ్ ప్రబుక నేన్లి పొది మోసిమ్ జా, సయ్తాన్ ఉదడ్డి రితి ఇత్తల్ ఒత్తల్ గెతె తా, జీవ్ నెంజిల బొమ్మల్క జొకరై తిలదు. 3 తుమ్ అన్నె దస్సి మోసిమ్ నే జతి రిసా తుమ్ కిచ్చొ అర్దుమ్ కెరనుక అంచి ఆస మెలె, దేముడుచి నుద్ది తిలి ఆత్మ కచి పెట్టి తిలె, జో మాన్సు యేసుక దూసుప కెరుక జోచి పెట్టి తయె నాయ్. జోక సాపెనచి కొడు జో సంగుక నెత్తె. పడ్డె, జో ప్రబుచి ఆత్మ మాన్సుచి పెట్టి తిలెకయ్ “యేసు దేముడు ప్రబుయి” మెన జో మాన్సు ఒప్పునుక తెరె.

4 దేముడుచి నుద్ది తిలి ఆత్మ ఎక్కిలోయి, వేర వేర సెక్తివరల్ దెయెదె. వేర వేర సెక్తివరల్, వేర వేర మాన్సుల్క జో దిలెకి, జో ఎక్కిలోచి ఆత్మయి జేవ్ ఎత్తి సెక్తివరల్ దెతోసా. 5 దేముడు జోచి ఆత్మవాటు వేర వేర సేవల్ వేర వేర మాన్సుల్క జో దెయెదె, గని జా సేవ ఎక్కిలో ప్రబుచి రిసాయి. 6 దేముడు రగల్ రగల్ కమొ కెరెదె, ఎక్కిలో ఇసి కెరెదె, అన్నెక్కో దస్సి కెరెదె, గని జేవ్ కమొ కెర్త సెక్తివరల్ ఎత్తి దెతోసా ఎక్కి దేముడు.

7 దేముడు ఎత్తి మాన్సుక జోచి ఆత్మసెక్తి వరుమ్ దా అస్సె, ఈంజ అమ్ దెకితసుమ్, జోక నంపజల మాన్సుల్ మొత్తుమ్ ‘చెంగిల్ తత్తు’ మెన, ఎత్తి మాన్సుక ఆత్మసెక్తి వరుమ్ దేముడు దెయెదె. 8 కిచ్చొ

మెలె, నుద్ది తిలి జోచి ఆత్మ ఎక్కిలోచి పెట్టి తా, జో మాన్సు ఒగ్గర్ బుద్ది తెన్ ప్రబుచి బోదన కెరుక జో సెక్తి దెతయ్. అన్నెక్లోచి పెట్టి ప్రబుచి జయ్యి ఆత్మ తా, ఆత్మతె గ్యానుమ్ జో మాన్సు సంగుక ప్రబు సెక్తివరుమ్ దెతయ్. ⁹ అన్నెక్లోచి పెట్టి జయ్యి ఆత్మ తా నముకుమ్, సెక్తివరుమ్ దెతయ్. అన్నెక్లోచి అత్తి వేర వేర జబ్బుల్ తిల మాన్సుల్క చెంగిల్ కమొ జర్గు జతు మెన ఒగ్గర్ కెర్త సెక్తివో జో దెతయ్. ¹⁰ అన్నెక్లోక జోవయించి అదికారుమ్ దెకయ్త రకుమ్లు అద్బుతుమ్ కమొ కెర్తి సెక్తి, అన్నెక్లోచి చోండి పుట్టవ ప్రబు జోచ కబుర్లు సంగదె, అన్నెక్లోక వేర వేర బుద్దివోక 'ప్రబు సికడ్లస గే నెంజితి గే' చినితి సెక్తివరుమ్ దెయెదె. అన్నెక్లో వేర రగల్ జో అగ్గె నే సికిల బాసల్ తెన్ లట్టబుక సెక్తివరుమ్ దెతయ్. అన్నెక్లోక బాసల్చి అర్దుమ్ సంగుక సెక్తివరుమ్ దా అస్సె. ¹¹ ఈంజేవ్ సెక్తివరల్ ఎత్తి కేనె తెంతో జెతయ్ మెలె, ప్రబుచి ఎక్కి ఆత్మయి, జేవ్ ఎత్తిజిన్చి పెట్టి జేవ్ వేర వేర కమొ కెర్తయ్. కేన్ మాన్సుక కేన్ సెక్తివరుమ్ జో దెయెదె గే, జోచి ఇష్టుమ్.

ఎక్కి ఆగ్ ఒగ్గర్ వాటల్

¹² కేన్ జవున్ ఆగ్ కిసి ఒగ్గర్ వాటల్ తవుల గే, జేవ్ వాటల్ ఒగ్గర్ జలెకి బెద ఎక్కి ఆగ్ కిసి జయెదె గే, దస్సి, క్రిస్తుచి ఎక్కి ఆగ్ జా నంపజలన మొత్తుమ్ బెదిలిసి. ¹³ అమ్ యూదుల్ జలెకి, *గ్రీసు దేసిమ్చ జలెకి, గొత్తి మాన్సుల్ జలెకి, గొత్తి మాన్సుల్ నెంజిలె కి, ఎక్కి ఆగ్తె ఎక్కి ఆత్మతె అమ్ నంపజలన జా బాప్తిసుమ్తె బెదిలమ్; అమ్ ఎత్తిజిన్క ప్రబు జోచి ఎక్కి ఆత్మతెయి పియడ్లన జలమ్, అమ్క ఒండిక ఎక్కి ఆత్మయి దా అస్సె.

¹⁴ అమ్చి ఆగ్క ఎక్కి వాట తయె నాయ్. అమ్చి ఆగ్తె ఒగ్గర్ వాటల్ తవుల. ¹⁵ "ఏక్ వేల చాటు ఆవ్ ఆతు నెంజి, జలె ఆవ్ ఈంజ ఆగ్క వాట నెంజి" మెన సంగిలే కి, ఆగ్క జా చాటు కచితుమ్ ఏక్ వాట జా తత్తయ్. ¹⁶ "ఆవ్ అంకి నెంజిచి రిసొ ఆగ్క వాట

* **12:13** 12:13 గ్రీసు దేసిమ్చ మాన్సుల్క సంగుల, గని ఇన్నె 'గ్రీసు దేసిమ్చ' మెన సంగిలె, యూదుల్ నెంజిలన మొత్తుమ్కయ్ సంగితయ్.

నెంజి” మెన కంగ్గో జవున్ ఏక్ వేల సంగిలే కి, జా ఆగ్గేక జా కంగ్గో కచితుమ్ వాట జా తత్తయ్. 17 జలె ఆగ్గే ఒండి అంకి జలె, కీసి నూనుక జతి? ఆగ్గే ఒండి కంగ్గో జలె, కీసి జుంగుక జతి!

18 ప్రబు జాన జానయ్ ఆగ్గేతె కిచ్చో కిచ్చో వాటల్ జో ఉచర్లి రితి బెదవ అస్సె. 19 జేవ్ ఎత్కి ఎత్కి వాట జత జలె, ఆగ్గే ఒండి కేనె తత్తి? 20 నిజుమి ఆగ్గే ఒగ్గర్ వాటల్ తిలె కి ఎత్కి ఆగ్గే జతతి. 21 జాకయ్, “తుయి తంక అంక నాయ్” మెన ఆతుక అంకి సంగుక బెదె నాయ్. “తుయి తంక అంక నాయ్” మెన చట్టోక బోడి సంగుక బెదె నాయ్. 22 జలె, నాయ్, ఆగుతెచ అప్పు డీస్త వాటల్ నెంజిలె, జింక నెంజె, 23 చి ఆగ్గేతె గవురుమ్ నెంజిల వాటల్క ‘డిసిలె లాజు’ మెన, గవురుమ్ కెర్త పాలల్ గలంతసుమ్. దెకుక సూటి నెంజిల ఆమ్చి ఆగుతె వాటల్ ఒగ్గర్ సూటి దెకయ్త. 24 ‘డిసుక సూటి’ మెన, తిల వాటల్క లుంకడుక నాయ్.

25 జలె దేముడు, ఒండి ఆగ్గే ఎత్కి సేంతుమ్ తతి రితి, ఆగ్గేచి వాటల్ ఎత్కి అన్నె ఆగ్గే వాటల్క గవురుమ్ దెకిత్ రితి, తొక్కి గవురుమ్చ ఆగ్గే వాటల్క ప్రబు ఒగ్గర్ గవురుమ్ దెతి రితి బెదవ అస్సె. 26 ఒండి ఆగ్గేచి ఏక్ వాటక నొప్పి అయ్లె, తిల వాటల్ ఎత్కిక బాద. ఒండి ఆగ్గేతెచి ఏక్ వాటక గవురుమ్ అయ్లె, తిలి ఎత్కి వాటల్క సర్ద.

27 జలె, తుమ్ జోక నంపజలస మొత్తుమ్ క్రిస్తుచి ఆగ్గే జా అస్సున్, చి తుమ్చితెచో ఎత్కి మాన్సు క్రిస్తుచి ఆగ్గేక వాట జయెదె. 28 పడ్డో, దేముడు మొత్తుమ్ సంగుమ్తె వేర కమొచి రిసా, ప్రబు వేర వేర మాన్సుల్క నిసాన అస్సె. తొలితొ జోచి నావ్ తెన్ బుల బుల సుబుమ్ కబుర్ సూనయ్త బారికుల్, పడ్డో జోచ కబుర్లు సంగితనక, పడ్డో బోదన కెర్తన, పడ్డో జోచి సెక్తిక జోచి అదికారుమ్ దెకయ్త వెల్లెల కమొ కెర్తన, పడ్డో జబ్బు తెన్ తిల మాన్సుల్క చెంగిల్ కెర్తన, పడ్డో బాదల్ తిల మాన్సుల్క తోడు కెర్తన, పడ్డో సంగుమ్చ కిచ్చో కిచ్చో కమొక ఏలుప కెర్తన, పడ్డో వేర వేర బాసల్ తెన్ ప్రబుచ కొడొ సంగితనక తిలన్.

29 ఎత్కిజిన్ ప్రబుచ బారికుల్ జవుల గే? ఎత్కిజిన్ జోచ కబుర్లు

సంగీతన జవుల గే? ఎత్కిజిన్ బోదన కెర్తన జవుల గే? ఎత్కిజిన్ వెల్లెల వెల్లెల కమొ కెర్తన జవుల గే? 30 ఒండి జబ్బుల్ తిల మాన్సుల్క చెంగిల్ కెర్తి సెక్తి ఎత్కిజిన్క తయెదె గే? వేర వేర బాసల్ తెన్ ప్రబుచ కొడొ సంగితి వరుమ్ ఎత్కిజిన్క తయెదె గే? జేవ్ వేర బాసల్ తెన్ కొడొచ అర్దల్ సంగుక ఎత్కిజిన్క సెక్తి తయెదె గే? 31 జలె తుమ్చి పెట్టి ముక్కిమ్చయ్ ఆత్మవరల్క తుమ్ ఆస జా. ఈంజయి నెంజ, అన్నె చెంగిలి వాటు దెకయిందె.

13

ఎత్కిచి కంట ప్రేమయ్ ముక్కిమ్

1 మాన్సుల్చ బాసల్ తెన్ కి, దూతల్చ బాసల్ తెన్ కి ఆవ్ లట్టల్లె కి, అంచి పెట్టి ప్రేమ నెంజిలె, రితి టమ్ము జవున్, కంచు గంటో బజయ్లి అవాడ్ రితి జతయ్. 2 పడ్డొ, ఏక్ వేల ప్రబుచ కబుర్లు సంగుక అంక సెక్తి తిలె కి, ప్రబుచ గుట్టుల్ ఎత్కి జోచి రిసాచి గ్యానుమ్ ఎత్కి ఆవ్ జాన్లె కి, డొంగ్రల్ ఉట్టువ ఎదిలి నముకుమ్ అంక తిలె కి, అంచి పెట్టి ప్రేమ నెంజిలె, కామ్క నెంజిలోసా జయిందె. 3 అంక కలుగు జలిసి ఎత్కి ఏక్ వేల బీద సుదల్క పూర్తి వంట దిలెకి, 'పున్నిమ్' మెన బలి జతి రితి ఆవ్ ఏక్ వేల అంచి ఆగె ఆగితె డయాడ్లెకి. అంచి పెట్టి ప్రేమ నెంజిలె, అంక ఎద్గరె కామ్క నెంజె.

4 ప్రేమ, జలె, అమ్చి పెట్టి తిలె, బాదల్ ఓర్పువ జా జీనుమ్దె. మెత్తన తా మాన్సుల్క కన్కారుమ్ దెకుమ్దె. ప్రేమ అమ్చి పెట్టి తిలె, గోసల్ జము నాయ్. అమ్చి సొంత గవురుమ్ సంగనమ్ నాయ్. సొంత గవురుమ్ ఉచరనుమ్ నాయ్. 5 అన్నె మాన్సుల్చి మరియాద కడుమ్ నాయ్. ప్రేమ అమ్చి పెట్టి తిలె, అమ్చి సొంత ఇస్టుమ్ జర్గువ కెరుక ఆస జము నాయ్. కోపుమ్ దెకవుమ్ నాయ్. పెట్టి కోపుమ్ తియనుమ్ నాయ్. 6 అమ్చి పెట్టి ప్రేమ తిలె, పాపుమ్ దెకిలె సర్ద జము నాయ్, గని సత్తిమ్ తిలి కిచ్చొ జవున్ కామ్ దెకిలె, సర్దయ్ జమ్దె. 7 అమ్చి పెట్టి ప్రేమ తిలె, అన్నెక్ మాన్సుల్చ తప్పల్క

ఓర్పువ జమదె. నముకుమ్ తెన్ తమ్దె. 'ఎత్తి చెంగిల్ జయెదె' మెన దయిరిమ్ తెన్ తమ్దె. ఎత్తి బాదల్ ఓర్పువ జా నిదానుమ్ తమ్దె.

⁸ ప్రేమ, జలె, కెయళ కి కేడె నాయ్. గని ప్రబుచ కబుర్లు సంగితి కాలుమ్, మాత్రుమ్, కేడెదె. వేర వేర బాసల్ తెన్ ప్రబుచ కొణొ లట్టబ్బిసి కి కేడెదె. గ్యానుమ్ సికడ్డిసి కేడెదె. ⁹ కిచ్చొక మెలె, అప్పె ఆవ్ గ్యానుమ్ ఇదిలిన్ జానుమ్. ప్రబుచ కబుర్లు సంగితిసి కి ఇదిలిదిల్ సంగితసుమ్. ¹⁰ గని పూర్తి జతినచి కాలుమ్ అయ్లె, ఆమ్ ఇదిలిదిల్ జాన్సిసి కేడెదె. ¹¹ ఆవ్ బాల తిలి పొది బాలబోదచి రితి లట్టబ్బె తిలయ్, బాలబోదచి బుద్ది తెన్ తిలయ్, బాలబోదచి రితి ఉచర్తె తిలయ్. గని వడ్డిలి తెంతొ, బాలబోదచి రితి ఇండుక ములిలయ్.

¹² అప్పెచి మట్టుక ప్రబుచి ఎత్తి కీసి చినితసుమ్ మెలె, గాండు డంకిల్ రితి సొస్టుమ్ డీసె నాయ్; అద్దుమ్తె దెకిలి రితి. గని తెదొడకయ్, కిచ్చొ అడ్డు నెంతె, సొస్టుమ్ దెకుమ్దె, అర్దుమ్ కెరనుమ్దె. ఆవ్, జలె, అప్పె ఇదిలిదిల్ జాని. తెదొడకయ్ పూర్తి అర్దుమ్ జెయెదె. ప్రబు అప్పె కి అగ్గె తెంతొ అంకయ్ కీసి పూర్తి జానె గే, దస్సి, తెదొడకయ్ జోక ఆవ్ పూర్తి జానిందె, అంక పూర్తి అర్దుమ్ జెయెదె.

¹³ జలె, తిన్ని పాడ్ నే జతె కెయళ తెయళ తాఁ గెచ్చుల. కిచ్చొ కిచ్చొ మెలె, ప్రబుచి రిసాచి నముకుమ్, పడ్డొ ప్రబుచి తెడిచి ఆస, పడ్డొ ప్రబు దెతి ప్రేమయి. గని, జేవ్ తిన్నితె ప్రబు దెతి ప్రేమయి గొప్పచి.

14

ఎత్తిజిన్ జాన్సి బాస తెన్ ప్రబుచ కబుర్లు సంగితిసి

¹ ప్రబుచి ప్రేమ తెన్ తంక తుమ్ ఆస జా, పడ్డొ, జోవయించి ఆత్మచ సెక్తివరల్క ఆస జా. జేవ్ వరల్తె ముక్కిమ్క దేముడుచ కబుర్లు సంగితి సెక్తివరుమ్కయ్ ఆస జా. ² కిచ్చొక మెలె, కేన్ జవున్ వేర బాస తెన్ ఎక్కిలో లట్టబ్బె, ప్రబు తెన్ని లట్టబ్తయ్, గని మాన్సు తెన్

నాయ్. మెలె, దేముడుచి నుద్ది తిలి ఆత్మచి తెడి ప్రబుచ గుట్టుల్ జో మాన్సు సంగితయ్, గని సూన్తో కేన్ మాన్సుక అర్దుమ్ జెయె నాయ్. ³ గని, తిలస ఎత్కిజిన్ జాన్తి బాస తెన్ ప్రబుచ కబుర్లు కో సంగిలె, సూన్తసక జోవయించి ఆత్మతె డిట్టుమ్ కెరెదె. జేవ్ నేన్లిసి జేవ్ సికుక జయెదె, చి నెతిర్లిన్క దయిరిమ్ జంక జయెదె. ⁴ తిలస నేన్లి బాస తెన్ కో లట్టబ్బె, జో లట్టబ్బొసొకయ్ లాబుమ్, గని తిలస జాన్లి బాస తెన్ ప్రబుచ కబుర్లు కో సంగిలె, నంపజల సంగుమ్ మొత్తుమ్కయ్ లాబుమ్.

⁵ జలె, తుమ్ ఎత్కిజిన్ ప్రబు దెత వేర బాసల్ తెన్ లట్టబ్బె అంక సర్ద, గని అన్నె కిచ్చొ ఆస జతసి మెలె, తుమ్క 'మాన్సుల్ అర్దుమ్ కెరంతి రితి ప్రబుచ కబుర్లు సంగుతు' మెనయ్ అంచి ఇస్టుమ్. సంగుమ్చ మాన్సుల్ అర్దుమ్ కెరంతి రితి సొంత బాస తెన్ కో జలెకు అర్దుమ్ సంగిలెకయ్, సూన్తసక లాబుమ్, ఆత్మతె వడ్డల తిలస నేన్లి బాస తెన్ ప్రబుచి కిచ్చొ జవున్ కోడు సంగితి కంట, తిలస జాన్లి బాస తెన్ ప్రబుచి కబుర్ సంగిలె చెంగిలి.

⁶ బావుడ్లు, ఆవ్ తుమ్చితె జా కెర తుమ్ నేన్లి బాస తెన్ లట్టబ్బె, తుమ్ అర్దుమ్ కెరంతి రితి ప్రబు దెకయ్లిసి కిచ్చొ జలెకు నే సంగిలె తుమ్క కిచ్చొ లాబుమ్? ఆవ్ తుమ్చి పాసి జా దేముడుచి సత్తిమ్ సూనవుక నెంజిలె, దేముడుచి రిసొ తుమ్క నొవి గ్యానుమ్చి సికడ్లె జలెకు, జో సంగిలి కబుర్ నే సూనయ్లె జలెకు, జోచి బోద నే సంగిలె జలెకు, అవ్ దస్సి నే కెరె తుమ్క కిచ్చొ లాబుమ్! కిచ్చొ లాబుమ్ నాయ్. ⁷ మూరి జలెకు, వీన జలెకు జివ్ నెంజిల రితయ్ బజింత్రలు, కి అవాడ్ జయెదె. బజెనక ఉచర్లె సొస్టుమ్ నే బజిలె, మాన్సుల్ రాగుమ్ కిసి చినుల? ⁸ పడ్డె, జమాన్లుచి నప్పిరమూరి జవున్ సొస్టుమ్ నే బజిలె, యుద్దుమ్ కెరుక మెన జేవ్ జమాన్లుతె కో తెయార్ జవుల? ⁹ తుమ్చి తెన్ కి దస్సి, తుమ్ సొస్టుమ్ అర్దుమ్ కెరంతి రితి తుమ్చి జిబ్ తెన్ నే లట్టబ్బె, లట్టబ్బె బాస తెన్ తుమ్ కిచ్చొ సంగిలిసి కిసి జాసనుమ్దె? తుమ్ మాన్సుల్క నాయ్, గని ఆరి వాదు తెన్

లట్టబ్బి రితి తస్తె.

10 నిజుమి, ఈంజ లోకుమ్తె ఒగ్గర్ ఒగ్గర్ బాసల్ తవుల, చి జేవ్ బాసల్ ఎత్తితె అర్దుమ్ నెంజిల కొడొ తయె నాయ్. 11 గని, కేన్ బాస ఆవ్ నేన్లె, జా బాస తెన్ ఎక్కిలో లట్టబ్బె, జో అంక వేరయ్ దేసిమ్చ మాన్సు జయెదె, ఆవ్ కి జోక వేరయ్ దేసిమ్చ మాన్సు జయిందె.

12 తుమ్చి తెన్ కి దస్సి. ప్రబుచ ఆత్మవరల్క తుమ్క ఆస అస్సెచి రిసా, ముక్కిమ్క నంపజలన మొత్తుమ్ ఆత్మక వడ్డితి రితి ప్రబు దిల వరల్ బుద్ది తెన్, నిదానుమ్ తెన్ దెరనుక అస్సె.

వేర బాస తెన్ లట్టబ్బె కిన్ తంక

13 ఎత్తిజిన్క కామ్క జెతి, ప్రబుచి కోడు కో వేర బాస తెన్ లట్టబ్బె, 'జా అర్దుమ్ సంగితి సెక్తి దొర్కు జవున్' మెనయ్ తుమ్ ప్రార్దన కెర. 14 అమ్ నేన్చి బాస తెన్ ఆవ్ జవున్ ప్రార్దన కెరె, అంచి ఆత్మయి ప్రార్దన కెరయ్, గని అర్దుమ్ నెంజిలి రిసా అంచి బుద్దితె పలితుమ్ దెరె నాయ్. 15 జాకయ్, ఆవ్ కిచ్చొ కెరుక? ఆత్మ తెన్ కి ప్రార్దన కెరిందె, మెన్సు తెన్ కి ప్రార్దన కెరిందె. ప్రబుచ గనుమ్లు ఆత్మ తెన్ గాయిందె, చి మెన్సుతె అర్దుమ్ తెన్ కి గాయిందె. 16 నెంజిలె, ఏక్ ఆత్మ తెన్ని తుమ్చితె ఎక్కిలో ప్రబుక కిచ్చొ జవున్ సర్ద తెన్ జోఒర సంగిలె, జా సెక్తివరుమ్ నెంజిలన జో సంగిలిన్చి కోడుచి అర్దుమ్ నేన కెర, జో మాన్సుచి సర్దచి జా ప్రార్దనతె కిసి జోచి మెన్సు బెదవ '*తెద్దిలి' మెన ఒప్పునుల? నెత్తిరి! 17 నిజుమి జో మాన్సు జోచి సర్ద సంగ తయెదె, గని సూన్తో మాన్సుక కిచ్చొ లాబుమ్ నాయ్.

18 తుమ్ ఎత్తిజిన్చి కంట ఆవ్ వేర బాసల్ తెన్ ఒగ్గర్ లట్టబ్బసిచి రిసా ప్రబుక అంచి సర్ద ఆవ్ సంగితసి. 19 గని, సంగుమ్తె ఆవ్ తిలి పొది అన్నెక్లో అర్దుమ్ నే కెరంతి, జేవ్ నేన్చి బాస తెన్ దెన్సు వెయిలు కొడొ లట్టబ్బి కంట, జేవ్ అర్దుమ్ కెరంత బాసచ పావ్ కొడొ జోవయింక బోదన కెర్తి రితి లట్టబుక అంక ఇస్తుమ్.

* 14:16 14:16 తెద్దిలి మెలె ఆమేన్.

నంపజలస ఆత్మక వడ్డిత్ రితి సంగుమ్తె కిచ్చొ కెరుక

20 బావుడ్లు, బాలబోదల్చి బుద్ది తెన్ తుమ్ తా నాయ్. పాపుమ్చి కామ్క జలె, నేన్ల బాలబోదల్ రిత తా, గని బుద్దిచి కామ్క జలె వడ్డిల రిత జా. 21 †మోసే పూర్గుమ్చొచి అత్తి దేముడు రెగ్డయల ఆగ్గుల్తె రెగ్డయలి కోడు కిచ్చొ మెలె,

‡“ వేర బాసల్ తెన్ వేర దేసిమ్లుచ మాన్సుల్చి చోడివాట్

ఈంజ దేసిమ్చక బోద కెరిందె.

కెరై కి, సూన్తి నాయ్ మెన

ప్రబు సిచ్చుచి తీర్పు సంగితయ్.”

22 జా కోడు నదు కెరై, నంపతిలసక నాయ్, గని నంపనెంజిలసకయ్ జేవ్క అన్మానుమ్చి పాపుమ్ లయితి గుర్తుకయ్ జేవ్ నేన్ల బాసల్ తెన్ లట్టబ్బిన్క ప్రబు సెలవ్ దెతయ్. జాన్లి బాస తెన్ ప్రబుచ కబుర్లు సంగితిసి, మాత్తుమ్, నంపనెంజిలసచి రిసా నాయ్, గని నంపజతసకయ్ ‘అర్లుమ్ కెరంతు’ మెనయ్ ప్రబు సెలవ్ దెతయ్.

23 జలె, నంపజలస మొత్తుమ్ సంగుమ్తె బెదితి పొది ఎత్కిజిన్ జేవ్ వేర వేర బాసల్ తెన్ లట్టబ్బె తిలె, వేర మాన్సుల్ జలెకు, ఎధరె నంప నెంజిలస జలెకు తెడి అయ్లె, తుమ్ ఎత్కిజిన్క ‘వెర్రి జా అస్తి’ మెనుల. 24 జాన్లి బాస తెన్ ప్రబుచ కబుర్లు ఎత్కిజిన్ సంగిలె, నంపనెంజిలొసా జవున్, వేర మాన్సు జవున్ తెడి అయ్లె, ఎత్కిజిన్ సంగితిసి సూన, జోవయించి పాపుమ్ చినన, జేవ్ ఎత్కిజిన్చి అత్తి సంగిలిన్క జో మాన్సు పరిచ్చు జలి రితి జతయ్. దేముడు దెతి తీర్పుల్ సూన్తయ్, చి 25 జోవయించి పెట్టి తిల గుట్టుల్ జోవయింక

† 14:21 14:21 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్డయలి ఆగ్గుల్ మెన అమ్ జానుమ్. ఈంజ కొడొ ఎత్కి బైబిల్తె అగిచి పాచ్ పుస్తకుమ్తె రెగ్డయ్ జా అస్సి. ఈంజ దెకపుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగ్డి దేముడుచ ఆగ్గుల్ మెన రగ్డవ అస్సి. ‡ 14:21 14:21 యెసయా 28:11-12, ద్వితియాపదేశ కాండుము 28:49.

సొమ్ము దీనుల, చి జోవయించి మొక్కె సెర్ను సేడ, ప్రబుక బక్తి కెరెదె, చి దేముడు తుమ్చి తెన్ తిలిసి జో బప్పనెదె.

26 జలె, అన్నె కిచ్చొ తుమ్క సంగుక, బావుడ్లు? తుమ్ సంగుమ్తె బెద వెసితి పొది తుమ్చితె ఎత్తి మాన్సుక కిచ్చొ జవున్ ఆత్మసెక్తి తయెదె. ఎక్కిలోక ఏక్ గనుమ్ గయిందె మెన తయెదె, అన్నెక్లోక కిచ్చొ జవున్ బోదన కెరుక మెన తయెదె, అన్నెక్లోక ప్రబు కిచ్చొ జవున్ దెకవ తిలిసి సంగుక మెన తయెదె, అన్నెక్లో కేన్ జవున్ ఆత్మబాస తెన్ కిచ్చొ జవున్ సంగెదె మెన తయెదె, అన్నెక్లోక జా కోడుచి అర్దుమ్ సంగెదె మెన తయెదె. సంగుమ్తె కిచ్చొ కెరె కి ఎత్తిజిన్క కామ్క జెతి రితి తుమ్ కెర. 27 కో ఆత్మబాసల్ తెన్ లట్టబ్బన తిలె, ఎక్కి, దొగుల గే తీగ్ల వర్న తెన్ జేవ్ బాసల్ తెన్ లట్టబ్బు, చి ఎక్కిలో జా అర్దుమ్ సంగును. 28 గని, అర్దుమ్ సంగితొసా ఒత్త నెంజిలె, వేర వేర బాసల్ తెన్ లట్టబ్బొసా సంగుమ్తె తుక్లె తా. జోక జొయ్యి బాసల్ ప్రబు తెన్ లట్టబుక, గని కో సూన్తి రితి నాయ్. 29 పడ్డె, ప్రబుచ కబుర్లు సంగితన దొగుల తీగ్ల జోచ కబుర్లు సంగుతు, చి తిల మాన్సుల్ జేవ్ సంగితిన్చి అర్దుమ్ ఉచరంతు. 30 అన్నెక్లోక ఒత్త వెన తిలొసొక ప్రబు కిచ్చొ దెకయ్లె, అగ్గెచొ తుక్లె తంక. 31 కిచ్చొక మెలె, ఎత్తిజిన్ వర్న తెన్ని ఎక్కిలోచి పడ్డె అన్నెక్లో ప్రబుచ కబుర్లు సంగుక జయెదె. దస్సి వర్న తెన్ లట్టబ్బె, ఎత్తి మాన్సు కిచ్చొ జవున్ సికుక జయెదె, ఎత్తి మాన్సు కిచ్చొ జవున్ అర్దుమ్ సూనుక జయెదె; జాగర్త సంగితిన్ జలెకి, దయిరిమ్ సంగితిన్ జలెకి. 32 ప్రబుచి కబుర్ జో సంగితి సెక్తిక ముద్దొ కెర్తి సెక్తి జోచి అత్తి అస్సె. తుక్లె తంక సూటి తిలె, తెరె. 33 దేముడు జోచి సంగుమ్తె సేంతుమ్ దెతొసా గని జో అల్లర్లు కెర్తొసా నెంజె.

34 ప్రబుచ మాన్సుల్చ సంగుమ్లు ఎత్తితె కెర్తి రితి, ఒత్తచి సంగుమ్తె కి తెర్బోదల్ తుక్లె తంక. జేవ్ లట్టబుక సెలవ్ నాయ్, దేముడు మోసె తెన్ దిలి ఆగ్గుల్తె రెగిడ్లి రితి మున్నర్నుల్చి తెడి జేవ్ తంక. 35 జేవ్ కిచ్చొ జవున్ పుసుక మెలె, మున్నర్నుల్క గెరి పున తంక. తెర్బోద సంగుమ్తె లట్టబుక చెంగిల్ నాయ్. 36 తుమ్

వేర ఉచర్తను జలె, దేముడుచి కోడు తుమ్చితెయ్ మొదొల్ జలి గే? నెంజిలె, ఎక్కి తుమ్ నూన అస్సున్ గే?

³⁷ 'ప్రబుచ కబుర్లు సంగితొసొ ఆవ్' మెన అన్నెకో ఉచర్లె, 'ప్రబుచి ఆత్మసెక్తి తతొసొ ఆవ్' మెన అన్నెకో ఉచర్లె, ఆవ్ తుమ్క రెగిడ్లిన్క 'ప్రబుయి దిలిసి ఆడ్త' మెన జో బప్పునుక. ³⁸ జో ఈంజ బప్పనె నాయ్ గే, జో మాన్సుక 'ప్రబుచి ఆత్మసెక్తి తిలొసొ' మెన ఆమ్ బప్పునుమ్ నాయ్.

³⁹ జలె, బావుడ్లు, ప్రబుచ కబుర్లు సంగిమ్దె మెన తుమ్ ఆస జా, చి జోచి ఆత్మసెక్తిక వేర బాసల్ తెన్ లట్టబ్లిన్క అడ్డు కెర నాయ్, ⁴⁰ గని కిచ్చొ కెర్లె కి, బుద్ది తెన్ మరియాద్ తెన్ సేంతుమ్ తెన్ కెరన.

15

యేసుక్రీస్తు మొర కచితుమ్ అన్నె జివ్ జలిన్

¹ జలె, అప్పె బావుడ్లు, సుబుమ్ కబుర్ సంగితి రిసొచి తుమ్క ఉచార కెరయిందె. ఈంజ సుబుమ్ కబుర్ తుమ్క నూనయ్లి పొది కిచ్చొ కిచ్చొ సంగిలమ్ గే, తుమ్ ఉచర. జా ఎత్కి తుమ్ నూన నంపజలదు. ² ఆవ్ సంగిలి సుబుమ్ కబుర్చి తుమ్ నే పచ్చితె నిదానుమ్ జా అస్సున్ జలె, జాచి రిసొ రచ్చించుప జతె అస్సున్. గని నంపజలన తెన్ తుమ్ బెదిలిసి ఆరిచి జలె, తుమ్క నముకుమ్ నాయ్.

³ జలె, అంక దిలిన్క 'ఎత్కిచి కంట ముక్కిమ్చి, జా' మెనయ్ తుమ్క ఆవ్ అన్నె తిలయ్. కిచ్చొ కోడు మెలె, 'జర్గు జయెదె' మెన పూర్లమ్ దేముడుచి కొడతె రెగ్డయ్లి రితి, అమ్చ పాపల్ గెచ్చయ్తి బలి జతి రిసొ క్రీస్తు మొర, ⁴ రోయి జా, 'జర్గు జయెదె' మెన దేముడుచి కొడతె అగె రెగిడ్లి రితి తిర్రత్క అబ్బొసి జోక అన్నె జియడ ఉట్టయ్లన్. ⁵ *కేపాక, పడ్డొ బారజిన్ సిస్సుల్ మొత్తుమ్క డిసిలన్. ⁶ పడ్డొ పాచ్ పుంజొ జిన్చి కంట ఒగ్గర్జిన్ నంపజలసక ఎక్కె సుటు

* 15:5 15:5 మెలె 'పేతురుక'.

డీసిలన్. జోవయింతె అప్పెక ఒగ్గర్జిన్ జివ్వి అస్తి, గని సగుమ్జిన్ మొర గెల.

⁷ పడ్డె, యాకోబుక డీసిలన్. పడ్డె సుబుమ్ కబుర్ సూనవుక మెన జో నిసాన్ల బారికుల్ ఎత్తిజిన్క డీసిలన్. ⁸ పడ్డె, ఆవ్ అగ్గె జోచో సిస్సుడు నెంజ తా, ఆవ్ సరి జతి సమయుమ్క నే జెర్నిలోసా జలె కి, ఆకర్క అంక కి డీసిలన్. ⁹ జోచ బారికుల్ ఎత్తిచి కంట ఆవ్ డాక్ జయిందె. 'జోచో బారికి' మెననుక ఆవ్ విలువ కి నాయ్. కిచ్చొక మెలె, జో దేముడుచ బక్తుల్ జల నంపజలన్క ఆవ్ అగ్గె †అల్లర్ కెరె తిలయ్. ¹⁰ గని జో దేముడుచి దయచి రిసా ‡రచ్చించుప జా జోచో బారికి ఆవ్ జా అస్సి, చి అంక కెర్లి దయ ఆరిచి నెంజె. జేవ్ ఎత్తిజిన్చి కంట ఆవ్ ఒగ్గర్ కామ్ కెర అస్సి, జా అంచి సొంత సెక్తి తెన్ నాయ్, గని అంచి పెట్టి తిలి దేముడుచి దయయ్ అన్నె ఈంజ కామ్ కెరవ అస్సె. ¹¹ ఆవ్ సుబుమ్ కబుర్ సూనయ్లె కి, జేవ్ సూనయ్లె కి, అమ్ ఒండి ఈంజయ్ ఎక్కి సుబుమ్ కబుర్ బోదన కెర్తసుమ్చి, తుమ్ నంపజలదు.

క్రీస్తు అన్నె జివ్ జా ఉట్టిసి మాన్సుల్ అన్నె జివ్ జా ఉట్టుక

¹² జలె, క్రీస్తు 'మొర్తికయ్, దేముడు జోక అన్నె జియడ ఉట్టయ్లన్' మెన సుబుమ్ కబుర్ తిలె, 'మొర్లస అన్నె జివ్ జా ఉట్టితి నాయ్' మెన తుమ్చితె సగుమ్జిన్ కిసి సంగుక జయెదె? ¹³ మొర, అన్నె జివ్ జా ఉట్టుక నెంజె మెలె, క్రీస్తు కి 'జివ్ జా ఉట్టె నాయ్' మెనుక జయెదె. ¹⁴ క్రీస్తు అన్నె జివ్ జా ఉట్టె నాయ్ జలె, ఆవ్ బోద కెర్తిసి, తుమ్చి నముకుమ్ ఎత్తి, ఆరి. ¹⁵ అన్నె దస్సి తిలె, దేముడుచి రిసాచి అమ్చి సాచి అబద్దుమ్చి జా తయెదె. కిచ్చొక మెలె, జోక 'క్రీస్తుక అన్నె జివ్ కెర ఉట్టయ్లన్' మెన సాచి సంగిలమ్. గని 'మొర్లస జివ్ జా ఉట్టితి నాయ్' మెలిన్ ఏక్ వేల నిజుమ్ జలె, యేసుక కి జో దేముడు జియడ ఉట్టవ తయె నాయ్. ¹⁶ కిచ్చొక మెలె, మొర్లస అన్నె జివ్ జా ఉట్టితి నాయ్ మెలె, 'క్రీస్తు కి అన్నె జివ్

† 15:9 15:9 బారికుల్ 9:1-3. ‡ 15:10 15:10 బారికుల్ 9:4-6.

జా ఉట్టె నాయ్.' 17 క్రీస్తు అన్నె జీవ్ జా ఉట్టె నాయ్ మెలె, తుమ్చి నముకుమ్ ఆరి అస్సె మెనుక జతి, చి అప్పొక తుమ్చ పాపల్ తెన్ని అస్సున్ మెనుక జయెదె. 18 జా నిజుమ్ జలె, క్రీస్తుక నంపజలన మొర్లన కి నాసెనుమ్తె గెచ్చ తవుల. 19 ఎక్కి ఈంజ లోకుమ్తెచి అమ్చి జివితుమ్చి రిసా క్రీస్తు అమ్క కామ్క జయెదె మెన అమ్చి నముకుమ్ తిలె, ఈంజ లోకుమ్చ మాన్సుల్ ఎత్తిచి కంట, అమ్మి నిస్కారుమ్ తిలన జమ్దె.

20 గని నిజుమి క్రీస్తు మొర్లు తెంతో జీవ్ జా ఉట్టె కెర, మొర అన్నె జీవ్ జా ఉట్టెక తిలనకతె తొల్పుర్ జా అస్సె. 21 కీతొలితొచొ మాన్సు ఆదాము పాపుమ్ కెర్లిన్చి రిసా మొర్లు మొదొల్ జా అయ్లి. గని మొర్లు తెంతో అన్నె జీవ్ జా ఉట్టెక అన్నెక్లొ మాన్సు తెంతో అయ్లి. 22 ఆదాముచి తెడి ఈంజ లోకుమ్చ ఎత్తిజన్ మొర గెతతి, దస్సి క్రీస్తుచి తెడి తిలన ఎత్తిజన్ అన్నె జీవ్ జా ఉట్టుల.

23 గని ఎత్తిజన్ సరిగా వర్స తెన్ అన్నె జీవ్ జా ఉట్టెక అస్సె. తొలితొ తొల్పుర్ జలొ క్రీస్తు అన్నె జీవ్ జా ఉట్టె అస్సె. వడ్డొ, జో ఈంజ లోకుమ్తె అన్నె ఉత్తె జెతి దీసిక జోచయ్ జల మాన్సుల్ కి జీవ్ జా ఉట్టుల. 24 జా జర్గు జలి వడ్డొక, ఆకర్క, * అదికారుమ్ తిలిన్ ఎత్తిచి ఉప్పిరి, † అదికారుమ్ ఎత్తిచి ఉప్పిరి, ‡ నెక్తివొ ఎత్తిచి ఉప్పిరి జో జిన గెచ్చ కెర, యేసు జోచి రాజిమ్ దేముడు అబ్బొన్చి అత్తి అన్నె సొర్వు కెర దెయెదె. తెదొడి ఆకర్ జయెదె. 25 మదెనె, జోచ విరోదుమ్ సుదల్ ఎత్తిక, జో జిన్తె ఎదక, క్రీస్తు సొంత ఏలుప కెరుక అస్సె. 26 జా ఆకర్క నాసెనుమ్ జలి విరోది, మొర్లు.

§ 15:21 15:21 రోమియుల్ 5:14-21, ఆదికాండుమ్ 3 అధ్యాయమ్. * 15:24 15:24 ఎపెసు 1:21 దెక. జీవ్ పొదులె ఈంజీవ్ తిన్ని కొడొ సంగిలె, దూతల్ బూతల్ గట్రచి రిసా సంగితె తిల. కొలోస్సియుల్ 1:16 కి దెక. † 15:24 15:24 ఎపెసు 1:21 దెక. జీవ్ పొదులె ఈంజీవ్ తిన్ని కొడొ సంగిలె, దూతల్ బూతల్ గట్రచి రిసా సంగితె తిల. కొలోస్సియుల్ 1:16 కి దెక. ‡ 15:24 15:24 ఎపెసు 1:21 దెక. జీవ్ పొదులె ఈంజీవ్ తిన్ని కొడొ సంగిలె, దూతల్ బూతల్ గట్రచి రిసా సంగితె తిల. కొలోస్సియుల్ 1:16 కి దెక.

27 “జో ఏలుప కెర్తి రిసా, దేముడు

ఎత్తి జోచి అత్తి సార్ప కెర దా అస్సె”

మెన రెగ్గ అస్సె. మదెనె క్రీస్తుచి అత్తి ఎత్తి సార్ప కెర దిలోసా అబ్బొసి.

జో అబ్బొన్కయ్ పిట్టవ, ఎత్తి క్రీస్తుచి అదికారుమ్ తెంతో అస్సె.

28 క్రీస్తు ఎత్తిక జీన కేడయ్లె, ఈంజ మదెనె జోచి అత్తి జా ఎత్తి సార్ప కెర తిలో అబ్బొన్చి అత్తి తెదొడకయ్ జొయ్యి అన్నె సార్ప కెర దా, జొయ్యి అబ్బొన్చి తెడి కి తయెదె. దస్సి దేముడు అబ్బొసి ఎత్తిక పూర్తి సొంత ఏలుప కెరెదె.

అన్నె జీవ్ జా ఉట్టుమ్దెచి రిసా బుద్ది ఇండ

29 మొర్లన అన్నె జీవ్ జా ఉట్టితి నాయ్ మెలె, నగుమ్జిన్ కిచ్చొక మొర్లనచి రిసా బాప్తిసుమ్ నజన్తతి? మొర్లన ఎర్గెరె అన్నె జీవ్ జా ఉట్టితి నాయ్ జలె, జోవయించి రిసా నగుమ్జిన్ కిచ్చొక బాప్తిసుమ్ నజన్తతి? 30 మొర్లన అన్నె జీవ్ జా ఉట్టితి నాయ్ జలె, ‘మొర్లిసి జీవ్ జా ఉట్టుల’ మెన ఆవ్ కిచ్చొక కెర్టొడ్ తెదొడ మొర్తి ప్రమాదుమ్ అనయ్తసి? జీవ్ జా ఉట్టుక నెంజె మెలె, ఇసి జలె తత్తయ్ గే?*

31 నాయ్, బావుడ్లు, తుమ్ నంపజలి రిసా ఆవ్ ప్రబుచి తెడి కెర్ది గవురుమ్ ఉచరంతసి గే, తెర్ది కచితుమ్ ఆవ్ కిచ్చొ సంగితసి మెలె, రోజుక ఆవ్ మొర్తసి. 32 ఎపెసు వట్టుమ్తె, జేవ్ కెల్క కెర్తి రితి ఆవ్ జంతువుల్ తెన్ జుజ్జిల్ రితి జలయ్. ఆవ్ దస్సి జతినతె ఈంజయ్ లోకుమ్తె అంక కిచ్చొ లాబుమ్! కిచ్చొయ్ లాబుమ్ నాయ్. మొర్లన అన్నె జీవ్ జా ఉట్టితి నాయ్ జలె, ప్రబుచి రిసా కిచ్చొ అల్లర్ సేడ్లె కక్క లాబుమ్ నాయ్, చి

† “కలిక ఆవ్ మొరిందె చి రిసా

అజి కంక, పియ కెర, ఎదిల్ సర్ల కెరుమ!”

§ 15:27 15:27 కిర్తనలు 8:6. * 15:30 15:30 మెలె, జో దస్సి మెన సుబుమ్ కబుర్ సూనయ్తె తత్తయ్, చి జా కోడు సూనుక నెసిలన కోపుమ్ జా జోవయింక మారుక ఉచర కిచ్చొ కిచ్చొ సిచ్చల్ కెర్తతి. † 15:32 15:32 యెనయా 22:13.

మెనుక జతి. 33 తుమ్ మోసిమ్ జా నాయ్! “పాపుమ్బుద్దిచ మాస్సుల్ తెన్ బెదిలె, చెంగిల్ బుద్ది తిలోసా కి పాడ్ జయెదె” మెన సంగితి కోడు నిజమ్. 34 అల్లె, ఉట్ట! బుద్ది జా పాపుమ్ ముల! సగుమ్జిన్ దేముడుక ఎద్దరె నేన్తి, చి జోవయించ రుజ్జుల్ దెకవుక అస్సె! తుమ్క ‘లాజ్ జా జతు’ మెనయ్ ఆవ్ ఇసి సంగితసి.

మొర, నొవి పోలిక జా పరలోకుమ్తె జెర్మిత్తిన్

35 గని తుమ్చితె కో గే కిచ్చొ పునెదె మెలె, “మొర గెలన కిసి జా అన్నె జివ్ జా ఉట్టుల? ఉట్టె, కిచ్చొ రగుమ్ ఆగ్ తెన్ తవుల?” మెన పునెదె. 36 ఓ బుద్ది నెంజొలోసా, తుక వెర్రి! కిచ్చొ జవున్ బి గలిలె, ఉప్పిర్చి చామ్ మొర్లెకయ్ జియ మొక్క జయెదె! 37 బీ గలితోసా గోదుమ్ గే, కిచ్చొ జవున్ వేర గిడ్డల్ గే పంటొ జంక జలె, జేవ్చి రూపుమ్ జా గలిలి బీక వేర జతయ్. జా గలిలి బి ఎత్కి గిడ్డయ్, జా ఉట్టితిసి మొక్కయ్. 38 గని జా బి జివ్ జా ఉట్ట గజ్జల్ జంక జలె, జో నిస్సాన్ల రూపుమ్ దేముడు దెయెదె. ఏక్ రగుమ్ గిడ్డల్చ మొక్కల్క ఏక్ రూపుమ్, అన్నెక్ రగుమ్ గిడ్డల్చ మొక్కల్క అన్నెక్ రూపుమ్ జో దెయెదె. 39 ఆగ్ తిలసక జలె, వేర వేర రగల్ రూపుమ్లు తవుల. మాస్సుల్క ఏక్ రగుమ్, జంతువుల్క అన్నెక్ రగుమ్, పిట్టల్క అన్నెక్ రగుమ్, మొస్సుక అన్నెక్ రగుమ్. 40 పడ్డొ వేర లోకుమ్చ జివుల్క ఏక్ రగుమ్ రూపుమ్లు తవుల, గని ఈంజ లోకుమ్చ జివుల్క వేర రగుమ్ రూపుమ్లు తవుల. వేర లోకుమ్తె తిలిన్చి ఉజిడి ఏక్ రగుమ్ డీసెదె, ఈంజ లోకుమ్తె తిలిన్చి ఉజిడి అన్నెక్ రగుమ్ డీసెదె. 41 షొద్దుక ఏక్ రగుమ్ ఉజిడి తయెదె, సుక్కల్క ఏక్ రగుమ్ ఉజిడి తయెదె, జోనుక అన్నెక్ రగుమ్ ఉజిడి తయెదె. అన్నె ఏక్ సుక్కొచి ఉజిడి ఏక్ రగుమ్, అన్నెక్ సుక్కొచి ఉజిడి అన్నెక్ రగుమ్ తవుల.

42 మొర్లన అన్నె జివ్ జా ఉట్టితిన్ తెన్ కి దస్సి. బి గలిలి ఈంజ ఆగ్ జలె, మొర్రిసి. అన్నె జివ్ జా ఉట్టితిసి, జలె, మొర్రిసి నెంజె.

43 బి గలిలి ఈంజ ఆగ్క గవురుమ్ నాయ్. అన్నె జివ్ జా ఉట్టి

మాత్రుమ్, అమ్చి ఆగ్ పరలోకుమ్చి ఉజిడ్ తెన్ గవురుమ్ తెన్ తయెదె. బి గలిలి ఈంజ ఆగ్క సెక్తి నాయ్, గని అన్నె జీవ్ జా ఉట్లె, అమ్చి ఆగ్ పరలోకుమ్చి సెక్తి తెన్ తయెదె. 44 బి గలిలి ఈంజ ఆగ్ ఈంజ లోకుమ్చి ఆగుచి జయెదె, గని అన్నె జీవ్ జా ఉట్లె, పరలోకుమ్చి ఆగ్ రగుమ్ తయెదె. ఈంజ లోకుమ్చి ఆగ్ రగుమ్చ ఆగ్చ అస్తి జలె, పరలోకుమ్చి ఆగ్చ రగుమ్చ ఆగ్లు కి తవుల.

45 దేముడుచి కొడతె రెగ్డయ్లి రితి;

‡“దేముడు తొలితో జెర్మయిలో మాన్సు ఆదాము జీవ్ తిలి ప్రానుమ్ జలన్”

క్రీస్తు జలో ఆకర్చో ఆదాము, మాత్రుమ్, జీవ్ దెతో ఆత్మయి జలన్.

46 ఆత్మతె జెర్మన్ జలసి తొలితో జయె నాయ్. తొలితో ఆగ్కయ్ జెర్మన్ జయెదె. పడ్డొకయ్ ఆత్మతె జెర్మన్ జయెదె. 47 తొలితోచ మాన్సు బుఝిచి మత్తి తెంతో జెర్మిలోసా జలన్. పడ్డొచో మాన్సు, మాత్రుమ్, పరలోకుమ్ తెంతో జెర్మిలన్. 48 మత్తి తిలోసా కీసా తిలో గే, జోచి పడ్డొ జెర్మిల మత్తి తెన్ తిలస ఎత్కిజిన్ దస్సయ్. పరలోకుమ్ తిలోసా కీసా గే, పరలోకుమ్చి జెర్మన్ జలస ఎత్కిజిన్ కి దస్సయ్ జవుల. 49 అప్పె మత్తితె తిలోసాచి పొలికతెన్ అస్సుమ్. దస్సి, పరలోకుమ్ తిలోసాచి పొలిక కి జమ్దె. 50 బావుడ్లు, ముక్కిమ్క తుమ్క ఆవ్ కిచ్చొ సంగితసి మెలె, ఈంజ లోకుమ్చి ఆగ్ ఈంజ లోకుమ్చి లోయి దేముడుచి రాజిమ్తె బెదుక నెత్తె. మొర్తిసి నే మొర్తిన్తె గెచ్చుక నెత్తె. మొర్తిన్క ఒత్తయ్ వాట తయె నాయ్. జాకయ్, ఒత్తయ్ గెచ్చుక జలె, మొర్తిన్ జతిక నే మొర్తిన్క పాయె నాయ్.

51 ఈందె, దేముడు దెకయ్లి గుట్టు తుమ్క సంగితసి. ఆమ్ ఎత్కిజిన్ మొరుమ్ నాయ్, అమ్ నంపజలస ఎత్కిజిన్ మార్పుప జమ్దె. 52 ఈంజ ఉగుమ్చి ఆకర్క ప్రబు నప్పిర్మూరి పుజిలె, అంకి రెప్ప నే పెడ్తె బేగి మార్పు జమ్దె. జో నప్పిర్మూరి పుజిలె, మొర్లస పరలోకుమ్తె బెదితి నే మొర్తి పొలిక జా అన్నె జీవ్ జా ఉట్టుల కి, జీవ్

‡ 15:45 15:45 అదికాండుమ్ 2:7.

తిలసయ్ కి దస్సి పోలిక జా మార్పుప జవుల. 53 కిచ్చొక మెలె, పాడ్ జతి ఈంజ ఆగ్ పాడ్ నే జతి రగుమ్ జా మార్పుప జంక అస్సె. మొర్తి ఈంజ ఆగ్ నే మొర్తి రగుమ్ జా మార్పుప జంక అస్సె. 54 పాడ్ జతిసి పాడ్ నే జతిసి జా మార్పుప జలి మెలె, దేముడుచి కొణ్ణతె రెడ్డయ్లి కోడు తెదొడ్కయ్ నెరవెర్పుప జయెదె.

§ “మొర్తుక పాడ్ కెర గెల కెర,
పరలోకుమ్చో దేముడు జీన అస్సె”

మెన ఏక్, పడ్డె,

55 * “ఓ మొర్తు, కేతె జిన్లది?

ఓ మొర్తు, కేతె తుచి విస్సుమ్?!”

మెన అన్నెక్ కోడు నెరవెర్పుప జయెదె.

56 జలె, మొర్తుచి విస్సుమ్ కేతె మెలె, పాపుమ్తె. † దేముడు తొలితో దా తిలి ఆగ్గుల్ పాపుమ్చి సెక్తి. 57 గని, జో దేముడుక జెయ్యి! అమ్చో ప్రబు జలో యేసుక్రీస్తుచి అత్తి జో అమ్క జీనవ అస్సె!

58 జాకయ్, ప్రేమ తిల బావుడ్లు, డిట్టుమ్ తా అన్మానుమ్ నే జతె, ప్రబుచి తెడి తుమ్ సైమ సేడ కెర్తి కామ్ ఆరి కామ్క నెంజిలిసి నెంజె మెన జానయ్, జోచి కామ్ తుమ్ నిదానుమ్ తెన్ కెర్తె తా.

16

బీదల్చి రిసా డబ్బుల్ ఉక్కుల్క

1 జలె, యెరూసలేమ్తెచ యూదుల్తెచ బీద జల నంపజలసచి రిసా డబ్బుల్ ఉక్కులిన్చి రిసా కిచ్చొ మెంతసి మెలె, గలతీయ ప్రాంతుమ్చ సంగుమ్ల్క ఆవ్ సంగిలి రితి, తుమ్కయ్ కి “దస్సి కెర” మెన ఆవ్ సంగితసి. 2 మెలె, ఎత్తి అయ్తరి తుమ్చితె ఎత్తి మాన్సు, గెలి సత్తరెక్క ప్రబు కెర్ది లాబుమ్ జోవయింక దొర్కు కెర తయెదె గె జేవ్ దెక, జాక ఏక్ వాట తియ తంక, చి సత్తరెక్క సత్తరెక్క.

§ 15:54 15:54 యెసయా 25:8. * 15:55 15:55 వోషీయ 13:14. † 15:56 15:56 రోమియల్ 3:20, చి 7:7-13 దెక.

సర్దు కెర్లె, ఒగ్గర్ జా తయెదె. చి ఆవ్ జెతి పొదిక ఉక్కుల్క తుమ్ బమ్మ జంక నాయ్. ³ పడ్డె, ఆవ్ అయ్లె, 'నిదానుమ్ కెరుల' మెన తుమ్ కక్క కక్క నిసాన్తె గే, జా గుర్తుక ఆవ్ ఉత్తల్ రెగ్గ దెయిందె, చి తుమ్ ఉక్కుల దెతి డబ్బుల్ యెరూసలేమ్ పట్టుమ్తె జోవయించి అత్తి తెద్రయిందె. ⁴ ఆవ్ కి గెలె చెంగిల్ మెన డీసిలె, అంచి తెన్ జేవ్ జెప్పల.

కొరింధీలతె పవులు గోత్ గెచ్చుక ఉచర్లిన్

⁵ ఆవ్ మాసిదోనియ వాట్ గెచ్చుక ఉచర అస్సి, చి ఒత్త గెలయ్ మెలె, తుమ్తె గోత్ జెయిందె, ⁶ చి ఏక్ వేల ఇదిల్ ఒగ్గర్ సేంపు తుమ్చి తెన్ తయిందె, నెంజిలె ఒండి చల్లి పొది కి ఒత్త తంక జయెదె, చి ఒత్త తెంతో ఆవ్ కేన్ ప్రయానుమ్ గెలె కి, తుమ్ అంక బార్ కెర తెద్రవుక జయెదె. ⁷ ఆవ్ అప్పె వాట్ గెతి పొది తుమ్క గడియ దెక ఉట్ట గెచ్చుక నెసి, గని ప్రబు సెలవ్ దిలె, పడ్డె గెలె, తుమ్చి తెన్ సగుమ్ సేంపు తా గెచ్చుక జయెదె. జయ్యి అంచి ఆస. ⁸ గని మదెనె, పెంతెకొన్సు పండుగు ఎద ఇన్నె ఎపెసుతె తయిందె. ⁹ కిచ్చొక మెలె, అప్పె ఇన్నె నుబుమ్ కబుర్ కామ్ ఒగ్గర్ కెరుక అంక వాటు దొర్కు జా అస్సె. గని విరోదుమ్ సుదల్ ఒగ్గర్జిన్ పిట్టవుక ఉచర అస్సి, చి ఆవ్ తిలెకయ్ చెంగిలి.

తిమోతి కొరింధీలతె గెచ్చుక తిలిసి

¹⁰ తిమోతి తుమ్తె అయ్లె, తుమ్ సర్ద తెన్ బెదవన. ఆవ్ కెర్రి రితి, జో కి ప్రబుచి కామ్ కెర్తయ్. ¹¹ జాకయ్, జో దాకు జలెకి కో జోక నిస్కారుమ్ దెక నాయ్. జో అంచితె అన్నె ఉట్ట జెంక మెన బార్ జతి పొదిక సర్ద తెన్ తుమ్ జోక అన్నె తెద్రవ. ఆవ్ తెద్రయ్ల అన్నె బావుడ్లు తెన్ జో ఉట్ట జెతిన్క ఆవ్ రకితసి.

¹² అన్నె బావుడ్లు తెన్ తుమ్తె గోత్ గెన్ను మెన, అమ్చొ బావొ జలో అపొల్లోక బలవంతుమ్ కెర్తయ్, గని అప్పె గెచ్చుక జోక సెలవ్ నాయ్. జోక వాటు తిలె, పడ్డెకయ్ తుమ్తె జెయెదె.

13 తుమ్ తెలివి తెన్ జాగర్త తెన్ తా, తుమ్చి నముకుమ్ డిట్టుమ్ దెరన, దయిరిమ్ తెన్ ఇండ, డిట్టుమ్ తా. 14 తుమ్ కిచ్చొ కెరుక జలెకి, ప్రేమయ్ తెన్ కెర.

15 జలె, బావుడ్లు, ఒండి అకయ ప్రాంతుమ్తె నైపనుచి గెర్చ తొలితో ప్రబుక సంపజల, చి ఎక్కి నిదానుమ్ తెన్ సంపజలన్క దెక తోడు తా అస్తి. 16 దస మాన్సుల్క చి అమ్చి తెన్ సైమ సేడ ప్రబుచి కామ్ నిదానుమ్ కెర్త ఎత్తిజిన్క తుమ్ మరియాద దెక.

17 సైపను, పొర్మానాతు, చి అకయక ఇన్నె ఉట్ట అయ్లిన్చి రిసా అంక ఒగ్గర్ సర్ద. కిచ్చొక మెలె, తుమ్ ఇన్నె నెంజిలె కి, జేవ్ అయ్లిన్ తెన్ తుమ్ అంచి తెన్ తిలి రితి జతయ్. 18 తుమ్చి ఆత్మక జేవ్ కిసి అన్నె డిట్టుమ్ కెర్ల గే, దస్సి అంకయ్ కి సర్ద కెర అస్తి. దస మాన్సుల్క తుమ్ మరియాద దెక.

కచి కచి ముద్దు సంగ తెద్రయ్లిసి

19 ఆసియా ప్రదేసిమ్చ సంగుమ్లు ఎత్తి తుమ్క జోవయించి ప్రేమ సంగ తెద్రయ్తతి. పడ్డో అకుల ప్రిస్కిల్ల జోవయించి గెరి సబ కెర్తి సంగుమ్చ ఎత్తిజిన్ తెన్ ప్రబుచి నావ్ తెన్ చి జోవయించి ప్రేమ కి సంగ తెద్రయ్తతి. 20 సంపజల ఇన్నెచ బావుడ్లు ఎత్తిజిన్ జోవయించి ప్రేమ సంగ తెద్రయ్తతి. ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జొకర.

ఆకర్ కోడు

21 ఆవ్ పవులు సొంత ఆతు తెన్ ఈంజ ఆకర్ కోడు రెగిడ్డసి. ఆవ్ రెగ్డయ్లిసి తుమ్ జాన్సు. 22 తుమ్చితె కో ప్రబుక ప్రేమ కెరె నాయ్ గే, ప్రబు జోక సిచ్చుతె తెద్రవున్. అమ్చొ ప్రబు, తుయి జె!

23 ప్రబుచి దయ తుమ్చి తెన్ తవున్. 24 యేసుక్రీస్తుచి తెడి అమ్చి ప్రేమ కి తుమ్చి తెన్ తవున్. *తెద్దిలి.

* 16:24 16:24 తెద్దిలి మెలె ఆమేన్.

Kupia New Testament
Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 4 Mar 2023 from source files
dated 29 Jan 2022

7ccb2690-4432-5e86-88c1-f8ee976f30f4